

**ASO TOFI, 20 IUNI 2019**

*Na nofoia e le Fofoga Fetalai le Nofoa i le itula e 9:14 i le taeao.*

Tatalo.

**FOFOGA FETALAI:** Ou te faasila sila atu ua toe amatalia nei Taualumaga ma Galuega a le Fono Aoao Faitulafono. E faatalofa atu ma le agaga faaaloalo i lau Afioga i le Palemia ma le Kapaneta, Minisita Lagolago faapea foi Taitafono ma le paia o le Palemene i ona Komiti, faapea foi Ofisa Sili o Pulega o Matagaluega a le Malo.

E pei lava ona silafia ua maea ona faia lau faaiuga i le po anapo. O le taeao nei o le a tuu atu le avanoa i le sui usufono mo Palauli le Falefa e saunoa ai, ona sosoo ai lea ma le Taitafono o le Komiti o Tupe. Ona lafo atu lea o le tatou galuega e saunoa le paia o le Malo. Ou te tapa ma le faaaloalo lau Afioga i le sui usufono mo Palauli le Falefa.

**Afioga Taefu Lemi (Falelatai ma Samatau):** Lau Afioga i le Fofoga Fetalai, e faanoi atu i lau Afioga, e tanoa tasi lava lau Afioga. Na ou maua i le po anapo lau saunoaga e toe toalua pe toatolu nai sui usufono e le i saunoa. Pe le maua ai i le vala lea so ta avanoa. Ma le faaaloalo lava lau Afioga.

**FOFOGA FETALAI:** Ou te manatu ua faatautuaupega lo lua afifio mai, ae sa ou vaavaai lava ma le totoa i lena itu o lo tatou.....peitai ona o le tele o tuatuagia le maalofia ua mafua ai ona le faatasi mai lau Afioga i le sui usufono mamalu. Ae ou te faasila sila atu, e lua a tatou Tulafono o lea o lo o talanoaina. O le Tala Faatatau Faaopoopo ma le Tala Autu. A tatou see atu i le iloiloga o mea taitasi ona maua lea o avanoa e lua e tai sefululima minute i le mea e tasi. Afai e lua avanoa i le mea e tasi i le Tala Faaopoopo e tolusefulu minute. E lua avanoa i le Tala Autu e tolusefulu minute, ua itula atoa le avanoa e saunoa ai le sui usufono mamalu.

Ona ou manatu lea e le taofia ai le faagasologa o a tatou galuega. O le mea la lea ou te manumanu i le faaiuga a le Nofoa. O le see i luma toe see i tua, o le mea la lea, o le a ou matauina ma le totoa sui usufono ia e le i saunoa. Ae i lo outou tulai mai i mea taitasi i le auiiliina o le Tala Autu ma le Tala Faaopoopo, pe o le a ou muamua lava ona tuu atu le avanoa ia te outou ina ia maua ai outou avanoa, e itula atoa outou avanoa. O le mea la lea, ou te faamalulu atu ne i molia i le tai taeao le Nofoa i le taitaiga, ona e manatu i le faagasologa, aua e le faapea o le a alu le sui usufono, tulou a sala le gagana o le upu e foi mai, e feagai ma ona faafitauli faaleaiga faaleitumalo, ae toe toso ai i tua la tatou galuega. Ou te faamalulu atu ona o itu ia.

O le mea la lea, e tapa le sui usufono mo Palauli le Falefa e tulai mai e faaauau le saunoaga. E lua a tatou Tulafono, o le Tulafono o galuega o le aso tau le Malo, o le faitauga faalua o Tulafono Tau Faaofi i felafolafoaiga.

Tulai mai le sui usufono e saunoa.

**20 IUNI 2019**

**TULAFONO TAU FAAOFI O LE FAATATAUINA O TUPE  
FAAOPOOPO (NU.2) 2018/2019 & TULAFONO TAU FAAOFI  
O LE FAATATAUINA O TUPE 2019/2020  
– felafolafoaiga i luga o le faitauga faalua**

**Afioga Hon FAUMUINA TIATIA FAAOLATANE LIUGA (Palauli le Falefa):** Faafetai i lau Afioga i le Fofoga Fetalai o le Maota po o le Fono Aoao a Samoa. Ua maea ona e siitia ma toto le taamu teevao i lo tatou va tapuia ma le Silisili Ese. O au faamanuiaga foi mo le Maota nei, ae tainane le tapuaiga a Samoa o lo o faafogafoga mai. O lenei taeao e pei ona silafia, o lo o naunau foi ina ia vave ona uma ma faamaonia le Tala o le Tupe, ina ia faagasolo galuega, aua toe tasi le vaiaso ona tapuni foi lea o lenei tausaga faaletupe i le vaiaso a sau.

Lau Afioga i le Fofoga Fetalai, e le toe taua foi pe asa i tua mataupu ua uma ona laga e le tele o sui usufono sa saunoa o lenei Maota. Faafetai i lau Afioga i le Fofoga Fetalai mo lou faapalepale ma lou onosai. E ui lava ina luga lalo saunoaga ma fetalaiga a lenei Maota, ae o oe o le toeaina o le Maota ua e masani i tulaga o le faafoeina o le Fonousu a Samoa. Faafetai Samoa i lau tapuaiga, o tatalo ma le tui mai o le mulipapaga, ua manuia ai faiva o lau Palemene.

Faafetai i Lana Afioga Mamalu O Le Ao o le Malo ma le Sui o le Fono o Sui Tofia. Lau Afioga i le Palemia ma le Kapaneta, faamalo galulue, tau ma outou i le ao ma le po. Ua tele faailoga vaaia e ui ina tele faitioga ma luitau e feagai ma lau afioga ma Minisita, aemaise foi ia i matou nei. E le o mafia ai lava ona tuuitiitia le taumafai mai o le alii o le lalolagi e lepetia lo tatou naunau e tautua Samoa ma atinae le atunu. Faafetai i le sui usufono fou le Tofa ia Namulauulu, o se tasi o tootooau o Puleono i Salafai. Faafetai malo lauga, e le fou ia te oe le fetalai i tulaga faapenei. O ou mama na ia e manuia ma manuia le itumalo ona o lau tautua.

Faafetai i le Minisita o Galuega i lau asiasiga i si ou itumalo, ma galuega ua e silasila i ai, faamalo. E pei lava foi ona tuualalo atu lau Afioga, e manaia pe a ta o, ona e le lava tupe i ou aao, ae o le a faasino atu le mea e tatau ona ave i ai le faamuamua, pe a uma foi le pisi i le tatou taligamalo i taaloga a le Pasefika. E faamalo i le Malo, mo galuega ua maea, pe ua faasolosolo foi ina maea. I le tausaga faaletupe lenei o le a faauma, na o le \$237 miliona tupe mo atinae. O le tausaga lea o le a tatou laasia nei, ua pau mai i lalo i le \$167 miliona ona ua tele galuega ua faamaeaina. Faafetai mo le atinae o le manaia le malae vaalele.

Ou te iloa so o se Samoa lava e alu pe sau, o ona moomooga ia ua mitamita i lona atunu. Faafetai le loto tetele, o mea ia e faaali ai le naunau ia fai le mea sili mo Samoa. E i ai le upu foi lea sa masani ona faalogo ai i aso ia o fai e le toeaina lea o Fuiono ma Lavea, fai mai e manatua pea o latou aso. Lau Afioga i le Palemia ma le Kapaneta ma lenei foi paeaiga...fai ni mea e manuia ai tatou. E faamau ai ma o mai tupulaga lalovaoa ma fesili po o ai na faia lea mea ma lea mea.

O lona uiga, ia manatua pea o latou aso. Faafetai foi i le faatulagaina ma le faaoo mai o le Tuisamo Cable. O Samoa o se tasi o atunu e matua valavalava ma atunu e maualuga a latou atinae.

20 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)**  
**2018/2019 & Tulafono Tau Faaofi o le Faatatauina o Tupe 2019/2020**  
**– felafolafoaiga i luga o le faitauga faalua**

Ae o le faaoo mai o le Marine Cable, o le a eliminate ai pe tuu itiitia ai le isolation factor i mea tau pisinisi, i mea tau femalagaaiga ma le tele o isi atinae e manuia ai Samoa. O le a fesoasoani tele foi le vaega lea, i le le lava o faiaoga, aua afai o le a faaaoga ia vaega faaonaponei, o le a faafaigofie ona faia e le faiaoga e tasi le vasega e ova atu i le selau i le aso e tasi, i le taimi e tasi mai le center i mea o i ai le lotoifale, ogatotonu o galuega faatekonolosi. Faafetai mo galuega lelei.

Faafetai mo le Minisita o Tupe i le Tala o le Tupe ma le Matagaluega. I le matau pea i ai, e 3% le vaega tupe faaleoleo mo mea e le fuafuaina, ae faafetai i le Atua ona o le faasaoina foi o lea vaegatupe mai tausaga taitasi ua mavae atu. Ma e avea lea ma mea e tele ai tupe faasao ma tuu atu i teugatupe mo atinae ma mea e ono faaletonu i le lumanai. Faafetai i lau Afioga Sili ma le Matagaluega o Tupe. Ou te faafetaia foi le Minisita o Tupe Maua, sa matou tuua le lui i le Minisita ma le Matagaluega i le tatou Tala o le Tupe muamua lava faatoa tatou o mai, e na o le \$488 miliona tupe maua. Na matou tuua lea i ai o le lui, ia uma ifo le Paeaiga lenei, ua au i le \$550 miliona le tupe maua e ao e le Matagaluega o Tupe Maua. Mo le silafia e lenei Palemene, ua \$540 miliona le tupe lea e aumai nei, e faagaoioi ai le tatou Tala o le Tupe lea o le a amatalia i le masina fou. E toe \$10 miliona lea e totoe Tialavea, toe \$10 miliona, o lona uiga o lea lava e te ausia le \$12 miliona i le tausaga faaletupe taitasi e faaopoopo ma faaopoopo pe. Afai la e \$12 miliona o lona uiga e le iloa pe oo atu i le tausaga lea o le a sau, pe ua \$560 miliona le sao o le Matagaluega o Tupe Maua. Faafetai, se malo le galulue, faafetai tele lava.

O le tuufatasiga o le Matagaluega o le Soifua Maloloina ma le Auaunaga o le Soifua Maloloina, e le o se mea faigofie, e faigata, e lavelave, e maaleale. E maaleale ona o le aafia, e le gata i tagata faigaluega a o tupe e faatino ai, ma le lototele e fai ai faaiuga faigata. Faafetai mo le auala sima lea e i Vaisigano, ua manaia le teuteuga foi o le tatou taulaga ona o le vaega tonu lea e sau ai le auala sima. Sa ou faapea lava e sau sao lava i luma o le falesa o le EFKS Apia po o luma o le Ofisa o le MNRE, ae le afaina lea, leaga e leiloa foi pe toe fai i se isi taimi. Faamalo le galue i lau Afioga mo le galuega lea, faafetai foi mo le talivai i Vaisigano ua puipuia ai nisi o aiga, ia ma a latou aseta faapea foi faetalimalo.

Faafetai mo le Falepuipui, o lea e masani foi ona ou alu asiasi ai, ia ua manaia le falepuipui ma o lea ou te talitonu e pei lava o le vaiaso a sau nei e tatala ai le Falepuipui ia e faamalo le galulue, sa lugā ma lalo lenei maota, ona o le naunautaiga ina ia fai se mea e sili ona lelei.

Faafetai foi i lau Afioga i le Minisita mo le Falepuipui i Vaiaata, o lea e te amanaia, ma o matou i Savaii e se a se a i ai ni tagata solitulafono, ia e leai foi ni tagata sosola e sosola ai i le Falepuipui i Savaii o, aua o tagata e lelei ia latou amio ae ua falepuipui ona o nisi vaega e le o ni solitulafono mamafa.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faiatauga faalua**

O le tatou taligamalo, taaloga a le Pasefika, o le matuai ou mimita lava, Loau, e le o se upu e avane ai, e manaia le sauniuniga. Ua uma foi ona ou fai atu, aua ne i lalo ifo o le 100 pine auro e maua, lea foi na ou fai atu ae fai mai o la ua i ai le tupe faaagaga e totogi ai le aufai pine auro, ia ae se i vaai la le pine auro lea e i ai le pine auro a Tuilaepa, leaga o le pine auro o la e tautau i le fale, ua leva lava ona i ai. Aua le avea i ai se \$1,000 aua e le o se pine auro moi. Tautuana ma lau Afioaga se i tagai ane i nai faipule leaga e private numbers ia le matou vaega, vaai ni nai plates foi ia ou te iloa e lelei ia Papalii pe a fai ni members of Parliament plate e aumai e travel ai ia sui usufono ia e leai ni a latou plates, ia access ai, aua e fia talia lau invitation, ae o le faalavelave, e o atu ae tutuli e securities, ia se i tautuana ma oe. Sa ou faalogo foi o taua e se saunoaga a se tasi o sui usufono, fai mai o mea ia o taaloga e gau. E leai se taaloga e gau, o le Malo, Matagaluega, o le mea a le Malo e fai, o le tuuina atu o le auauanga i ona tagata. E le fai pisinisi le Malo ae fai atinae e manuia ai ona tagata. O le vaega lea, aua e te popole i le pola e motu i tua, fai taaloga ia lelei. E \$160+ miliona sa faaalu i le 2007, o le a le mea lea ua i i ai? Ua totogi faafia mai lena \$160 miliona i le tele o mea e fai i inei, le image o Samoa i fafo faaopoopo le 15 po o le 20% i sports tourism, o le mea foi lea ua alualu ai i luma, ia tupe maua a Sala ma lana vaega, ona o taaloga.

Faafetai ua ou faalogo atu ua taua le uafu i Asau ma le uafu i Salelologa, faafetai Tuilaepa, e ese le fia faalogo i se tala e fiafia ai, o la foi e faalogologo mai si o matou motu i Salafai, o lo tatou motu, e tatou te Savaii uma lava. E le faapea a ta nofo i inei ia ae o le lelei foi o le tele o atinae i Savaii o le mafai ona toe omai i inei, ma palota fua i inei ia Lealailepule ia ma le vaega lea o Faumuina Wayne, ia ae tatau lava ona nonofo pea matou i o, ia ae o tala lava e avatu ina ia atagia ai ia le tulaga o i ai le vaega lea.

Faafetai i lau Afioaga i le Palemia, mo lou galue mamafa ina ia aumai le fono a le ACP ma le European Union, e saini le feagaiga i Samoa nei. O se matua laasaga e tasi lea vaega e iloa ai o Samoa e le o toe i lalo, ua i luga. E tatou te le faatauemu i si o tatou atunu tatou te mitamita ai. O le mea e sili ai ona ou fiafia, o le Pasefika lea o le a oo mai ai le faasologa o le Peresetene po o le Taitaifono o le ACP. Ou te le i taua i le toeaina, ae na ou manao lava au ia, se i silafia lava e se isi, na fono le Pasefika, ina ua oo mai le faaiuga, tatalo mai le vaega o Aferika, e a pea a faaauau ia le latou Presidency i le taimi e rectify ai le agreement. Ia ou fai atu loa i le matou au Pasefika, tatou o tatou i o se i fai se tatou tala po o le a le mea e fai. Ia ua fai ia le matou tala ma ua matou malilie ai, ou fai atu sau se isi o outou na Papua Niu Kini ma Toga, ae fai mai e leai, e lelei oe e te matua, e toe fefefe Aferika ia oe. Ia o le mea lena na fai, ae o lea la o tatou lea o le a saini ai le agreement, e toe Taitaifono ia le Samoa i le amataga aua o lea ua agree ia le matou fono, o le aso lava e saini ai le agreement, o le aso foi lena e take over ai le Pasefika. Ia ma o Samoa foi la o le a avea ma Taitaifono, po o le Peresetene o le ACP ma le Joint Parliamentary Assembly a le European Union ma le ACP.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O le tasi lena mea lau Afioga i le Fofoga Fatalai, e pei e tatau pe a... afai o le a nofo le Samoa i luga, e tatau ona i ai se isi... o le mea lea e lelei pe a alu i Brussels, aua ta te alu atu o la e i ai le embassy, ae ata alu loa i se isi mea, ia ona alu toatasi lea, ae afai foi e service e le secretariat a le ACP ia Ofisa o le Peresetene, ia ae i ai lava le limitations. E tatau lava ona i ai se tagata, e a foi lea, e lagolago i le Taitaifono, po o ai lava o le a i ai i lea taimi, ia o mea mananaia ia lau Afioga i le Fofoga Fatalai.

O le Tala o le Tupe...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi (Palemia):** Lau Afioga i le Fofoga Fatalai, mo le silafia e lau Afioga, e faapea foi le Maota e na o se mea e fia faamalamalama, o lena e faalogologo atu i le saunoaga a le sui usufono mamalu, o lo o agiagi mai i mataupu ia e tau i le Faalapotopotoga nei o le Aferika Karepeane ma le Pasefika. O le faalapotopotoga lea, e i ai ia fono e faauluuulu i Minisita o atunu taitasi e avea ma sui i totonu o le faalapotopotoga o le ACP, ae i ai foi la ma le fono e tuufaatasi a faipule uma o le 106 atunu, 27 atunu o Europa, ia ma le 79 ia atunu o Aferika, Karepeane ma le Pasefika. E fai la e pei o le faiga foi lea faalemalu e i ai le Malo ao luga ae, e i ai foi le fono faa-Palemene a Europa atoa faapea foi ma Palemene uma o Karepeane, Aferika ma le Pasefika.

Structures ia na faatu mai lava i le tausaga e 1975, e i ai la e sui e fili atu e saofafai ai i le fono lea a faipule tuufaatasi i Luxembourg atunu uma i Aferika, Karepeane ma le Pasefika faapea foi ma Europa. Ia lea la ua faatulai mai ai lo tatou sui i le taimi lenei, o le Afioga lena ia Faumuina. Ia o le ala foi lea e sausaunoa ai e malamalamalama i le mataupu o lo o faatalanoaina i totonu o le mataupu lea o le a sainia mai i Samoa ia le feagaiga tele lenei mo le 20 tausaga, o se taimi muamua lea ua aveese mai ma Aferika, ma o le a sainia mai i Samoa nei o lea ua uma ona fai le faaiuga o le tausaga fou, po o se taimi i le afa lona lua o le tausaga fou e saini mai ai i Samoa nei.

Ia ma e toeitiiti foi uma le taimi o Faumuina ona faapena lea ona faasolosolo, sa auai ai foi le Afioga lena ia Fonotoe, ia uma foi Fonotoe ona faapena tai tausaga, uma ane lea nofoaiga, ua faapena ona faasolosolo i sui usufono o le Palestine. Sa i ai foi ia Gatoloaifaana. E pei o faiga ia o lea e taumafai i ai, ina ia maua ai foi le avanoa mo outou o sui usufono o le Palestine, e silafia ai foi ia atinae, o lo o faatino i lena vaega o le lalolagi, ae o lea e auai ma Samoa. E pei lava sa o atu nisi o sui sa auai ia, ae o lea foi toetititi uma Faumui, ona alu atu foi lea o le afa faasolosolo i isi. Ia o le mafuaaga lena ua ou tulai atu ai, e fai si loloto o mea ia e saunoa mai ai ia Faumui, ia ae a fua i luga o le faatinoga o ona ia foi tiute ma ona tofiga, o lea e faalautele ai foi lona malamalamalama, i gaioiga a atunu uma ia e 107 o le lalolagi ua toeitiiti lava tutusa ma Malo Aufaatasi le tele mo le silafia e lo tatou Maota nei, ia aemaise foi o le faafogafoga mai o Samoa.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**FOFOGA FETALAI:** Malo, ua manino lea vaega, se i tulai mai le Afioga i le sui usufono mo Palauli le Falefa.

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai, faafetai foi i le faamalamalamaga auiliili a le Afioga i le Palemia, ia o lea ua oo mai lau faamatalaga i le Budget. Ou te le toe talanoa i isi vaega ua uma ona saunoa i ai ia afioga i sui usufono mamalu o le Palemene.

O le agavaa tutusa, o le agavaa tutusa lea ou te fia talanoa i ai, o le agavaa i le context, o le tagata o la e vulnerable lona tamaoaiga i le tulaga o lona foi siosiomaga. I le vaavaai atu i lipoti faaletausaga a le Matagaluega o Aoga, i le vaega lea o le Tausaga 1 e tau Tausaga 8, 27,000 tamaiti e drop out mai i aoga, i le Vasega 9 i le Vasega 11, e ova foi i le 10,000 tagata e o ese mai. E oo atu foi i le Iunivesite, ua i ai foi isi tagata ua o ese mai.

O le Iunivesite la, e pei o le fili numera tasi la e i ai, o le le feauautai o le faasoa a aiga e totogi ai pili o tamaiti aoga. Ae o le vaega lea e i lalo, o lea e totogi e le Malo le free education up to Year 11.

Lau Afioga e pei ona ou fai atu, e tiga lava lo tatou naunau ma fesoasoani, ae i ai lava naunautaiga ua gata le malosi o loto ma mafaufau e totogi ai pili o aoga. Ia, aua ana fai foi tatou e tutusa e popoto uma, o lona uiga e leai se tagata e alu e moa le vao, tae le otaota, fufulu faamalama, ia pe faata foi le auala ma isi lava tulaga o le vaega tonu lea, o le a fai atu ai sau tuualalo, i le agai atu i le lumana. O taaloga...

**Afioga Hon Loau Sola Keneti Sio (Minisita mo Aoga, Taaloga ma Aganuu):** Lau Afioga i le Fofoga Fetalai...leaga ne i te i ua....

**FOFOGA FETALAI:** Se i tulai mai le Minisita mo Aoga, Taaloga ma Aganuu.

**Afioga Hon Loau Sola Keneti Sio:** Ae lelei ona ou tulai atu leaga e tatau ona faasao ia le tulaga lea, ona o fuainumera, o lea e matau atu e 25,000 lea e drop out mai le 1-8. O lona uiga ua leai ni tatou tamaiti aoga, ma le 10,000 i luga i le 9-11. Se i toe silasila ifo le Afioga i le sui usufono i ana fuainumera po o sao, a o le aofaiga lena o tatou tamaiti o lo o aooga i le taimi lenei. Ma le agaga faaaloalo.

**FOFOGA FETALAI:** Malo. Ia se i toe tulai mai le sui usufono.

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai, ou te iloa foi e le o faitaua e le Afioga i le Minisita lana Lipoti. O lipoti la e i ai e 40,000 tamaiti e aooga i le vaega lea o le Primary School.

20 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Sa ou fesiligia foi le CEO po o le a le mea ua tele ai faapea, ae fai mai, e sao, o tamaiti lava latou ua fiu lava le mea e fai atu ae le fia aooga. E pei o le tulaga lena o lou talanoa atu o le Lipoti, ae a faapea o la e sese le Lipoti, ona toe faasao lea lau Afioga.

O taaloga. O le tele o tatou tagata, o tasi lea auala e mafai ai ona matua fiafia i ai, e le lelei i le mental area ae lelei i le physical area. O lea ou te vaavaai atu i le Budget, o lea e i ai tupe e ave i le au lakapi, i ai foi tupe e ave i isi taaloga. Ae a pe a tau siisii i luga? O le Tala o le Tupe lea na avatu e le Iuni Lakapi i le tausaga faaletupe lea ua tea, na o le \$11miliona, e le feauautai, \$4miliona e maua i Samoa nei, \$5miliona e aumai fafo ma a latou fundraising e \$2miliona ona \$11miliona lea, ae a pe a ave i ai se \$3miliona mai le Tala o le Tupe, leaga o lea e i ai tamaiti ia ua o ese ma aoga ua tatau ona develop. A silasila lau Afioga i le Minisita o Tupe, o le tele o tupe nei e maua mai totonu o le tatou atunu, e maua mai tamaiti nei ua alu i luga lo latou atamai i le lakapi, ou te iloa pe ova i le selau ma ona tupu, ma e tele foi tupe maua i le foreign reserves e maua mai ai.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, e taua tele le tuualalo lea e aumai le sui usufono. Ia ma ta te tau matamuli foi e talanoa i ai, leaga o au e Taitaifono o le Iuni toe Taitaifono i le fono a le Kapaneta. Ia, ma o le taimi a e taunuu mai ai le talosaga ona ou faailoa lea i lau Kapaneta, o le a ou taumafai ou te gugu ma ou tutuli ae fai e outou le faaiuga, ae tau tuuaia atu ai ma au.

I le upu lava lea ou te le iloa po o le a le faasamo, o le konifiliki intalesi ea po o le a ea le igoa o le mea. A ou faasamoaina, pei ua e faaauau teisi i lau Vaega, a o lea e tele le mau... tagi mai le au siisii, a o le au siisii lea e maua ai tatou pine auro, ma o lea foi e faapea mai, e le o maua lava ni pine auro mai le lakapi ia. Sa tatau ona ave uma tupe i o i le siisii. Tagi mai le aufusu, tagi mai lea vaega, ia manatua la o lea e saofafai ai tina i totonu o le... ona faapea mai foi lea o tina ia e toalua, e pei lava a lilifa alii tou mea i... ae faapea le matou basket ball? O le tulaga lena, e i ai le upu foi lele o manava o maile ia tele ni tupe e maua, ae tasi lava le mea e maua ai tupe, o lafoga. O lena tou te silasila a fai atu i tagata e totogi mai latou lafoga ae muga.

O le tulaga la lena e taua tele ai finagalo ia e faaalia. E taua ona e i ai le sootaga o mea ia o tupe saili mai ma le mea e agai i ai le tupe ma tau faasoaso, lea e taua e isi o le keke. O le keke e le femeiai le keke. A aumai loa le tatou keke e faapena le lapoa, e faapena foi lava le lapoa o le keke e le toe fefete, ona faaso loa lea. A tele la le fasikeke a le isi, e tatau loa ona ooti mai le fasikeke a le isi, e faapea lava ona fai le faasoasoaga. Ae sao lelei lava le mea lea e te saunoa mai ai, o le mea lea e te saunoa mai ai, o lea ou te tilotilo atu ua e faaauau tele lava i le lakapi.

20 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)**  
**2018/2019 & Tulafono Tau Faaofi o le Faatatauina o Tupe 2019/2020**  
**– felafolafoaiga i luga o le faitauga faalua**

Ia ua tutusa lelei a la le ta faaaauau, a o le faalavelave e i ai foi sui o le Kapaneta e basketball, o isi e volleyball, o isi e kirikiti, o isi e tapolo, o isi e faataavalevale polo, o isi e taaalo i le taaloga foi lele o le lotelote polo, o polo ia ou te taua, o mea foi nei e faataavale. Ia manatua foi la o le taaloga lena a e tago loa e faataavale le polo aua ou te taalo ai foi, e lotelote muamua, e lotelote muamua foi lea le polo, solosolo, ona faatoa e punou loa lea e faataavale. E i ai la le au tapolo, e i ai le au lotelote polo, e i ai le au po polo, ou te le iloa, pau lenei o le taaloga e polo, polo, polo. A o le tulaga lea e i ai, e vaivai le tatou faasoa. A o le taua o le saunoaga a le sui usufono, e faalauiloa atu ai i pisinisi ia e le o totogia sao latou lafoga, pisinisi lea e le o avea i faletupe a latou tupe, fai ma le silasila o lea e tatou te i inei uma lava i Samoa e iloa uma lava e nei foi Samoa mea uma na tou te faia. E tou te fiu a la tou te feosofai solo mai lalo, ae pei lava o le malama le vaai a Seigafo ma lana vaega i le suega maia o tupe se i faatino ai taaloga a tatou fanau. Ae taua tele le faamanatu a le sui usufono, ona o le lakapi, o lea e pei e faaaauau uma i ai tagata. Ae a faapefea nei isi taaloga ia, e tatau lava o le mea o le faasoa lima lelei, e tatau lava ona faasoasoa i isi taaloga ia e tilotilo mai.

**FOFOGA FETALAI:** Ia, se i tulai mai le sui usufono mo Palauli le Falefa.

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai, faafetai. Ia ona o lea ua faaui lavae le Afioga i le Palemia, o lea e tele lava le lisi e alu ai, e lavea ai ma isi taaloga. Ae pei ua ala ona ou faamuamuaina le lakapi, e le gata o la e promote ai tourism, ae o la e maua mai ai tupe i konekarate ia e taaalo ai a tatou alo ma fanau a Samoa i fafo, a o lea o le kirikiti, o le soka, fusuaga, weightlifting le pii foi lea pii kalate, ma isi. E ala ona ou fai atu faapea, ona o drop outs mai aoga, lea e mafuli i taaloga. E tatau la ona tele se fesoasoani tupe e ave e develop ai o tatou tagata. Ou te faafetai foi i le faaiuga lea na fai e le Iuni Lakapi, le Board e fai ai le Super 9. Ua tatau foi ona increase i luga remunerations e ave e matuai uunai ai ma toe vaevae atili ai itumalo lakapi ina ia aua ne i toe taua o le Super 9 a o le Super 12, ina ia refine refine tagata ina ia toatele ni alo ma fanau e agavaa e taalo i fafo. E faapena foi i i taaloga ia. Ae pei ua ou taua le lakapi ona o le tele o avanoa ua tele foi aiga ua faamanuiaina ai.

O le isi vaega e mafuli i ai tagata ia ua tuua aoga, o le aufaifaatoaga, ua tatau foi ona faatele se tupe ia fiafia ai tagata e o e fai faatoaga e omai e fai a latou faaaliga. Ai ua gasegase le Minisita o Faatoaga, a o le faaaliga lea e \$500,000 e ave i ai. Ae a pe a ave se \$2milliona? A \$2milliona e te vaai i ai tele puua, tele povii, tele koko, tele mea e aumai e faaali ae amata ai ona o tagata e fai atinae o faatoaga. O le matou itumalo, na ona e le aoga lava, taulelea pe aualuma irrespective with your age ina ia iloa ai e faigata le mea o le tautuaina o aiga ma nuu.

20 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O le isi vaega o le mea lea o le faaaliga o le ie Samoa, sa ou matua matamata lava. E alu atu le tagata lea e siamupini i le lelei o le lalaga, o le 12 tausaga, 14, 15. O tagata ia ua le fiafia e o e faaaoga o latou mafaufau e aooga ia popoto, a o la e mafaufau e i ai isi taleni e aoaoina ai latou. Lau Afioga i le Palemia aua o oe lea e te taitaifono i i, ia matua fai ia tele ni tatou ietoga, tasi lea mea e fiafia i ai loomatutua, aua a tolu afe i le ie e tasi ae fa au ie e maua, ia ua maua lau sefululua afe i le tausaga faatasi ma...

**FOFOGA FETALAI:** Tulai mai lau Afioga i le Palemia.

**Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, ua ou fiafia tele i le tuualalo a le Afioga i le sui usufono, a o lea tatou te i ai uma i i. Se faamolemole a fono outou itumalo ma outou nuu ona faataua ane lea o mea ia o falelalaga ona o le ki atoa o le faaauau ma le maua pea o ie ia measina lea faatoa maua tonu a mea e igoa o measina, o le ki ma le tatala. O mea ia o le uunai a tatou fono a nuu ma faipule. O lea ou te manatua na ta talanoa, na e oo atu ea i le isi aso o le a taofi e le tou nuu mea ia o falelalaga, ua feita toeaiina ua faasolo ai lava fono a loomatutua ma momoe ai i i, a o la e foi e faatalitali mai le toeaina ia i se afiafi e alu atu e fai se la lotu. A o le nofo ai i i, nofo ai a i alu le vайaso o nofo ai a i i, ia ma fai a latou tala, a o le auau atoa o tala nei, o la e talie i toeaiina ua le mafaia se mea.

O le mea la lea, se i alolofa la tatou nei, se i tau ane i toeaiina o tatou nuu aua le faalavelave i falelalaga ae ia uunai pea falelalaga ae logo foi i loomatutua a ta loa le fitu i afiafi o loa e fai latou faigalotu faatasi ma fanau aua o le mea lena e malepelepe ai ulugalii, failotu faatasi ma fanau ma ave le lagolago malosi. Ma le isi mea, o le agaga atoa o le polokalame lenei, aveese mea mataga ia tetele, ua tauau ea ina leai ni laau e toli ai ulu ona ua faavagavaga e tasisi ai nei mea i luga i le lagi a o le mataga ia ona o le upu foi lele, se e mamalu a mea mataga. A o ai e faia le upu lena? E fai a e toeaiina. A o la e ua lalaga lalaga e tina mea nei, ua faulai. Ua tanu i lalo o moega, se i vagana nai faifeau ia e manuia ai. O lea foi la e faalogologo mai faifeau, se uunai e outou le mea. Lauga mai luga o le pulelaa ma faamalosi mea nei o le lalagaina, aua a le faia a mea ia i i, e alu atu lava ia te outou, e lulu a ia te outou le nafinafi.

O le mea la lea ua taua ai le faamanatu, se i talanoa i outou nuu, lagolago le tatou polokalame, leaga o le polokalame lea, o le polokalame na o mea lelei mea lelei mea lelei e maua ai. Pau a foi lenei o le polokalame ua na o le feita feita o le Treasury i le alu ai o le afa miliona i tausaga uma tausaga uma tausaga uma, ua na o le faatiga loto mai o le Minisita o Tupe i le Minisita o lo o nafa ma mea ia, ona pau a lenei o le polokalame na o tupe alu. Ona lalaga lea e loomatutua a latou ie, toe o faatau ae na o le alu ai o tupe a le Malo e uunai ai loomatutua e o ifo e lalaga ie mo latou lava faalavelave. Vaai la e ese le manaia o lea polokalame a le tatou Malo, e le faia e ni tagata corrupt ia mea. A o le a le mea lea e maua i le OLP, o le faigamalo o le faigamalo corrupt.

20 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Ae ala ona fai mea ia, o le uunaia o polokalame mo le lagolagoina ma le faamalosia o tatou ma agaifanua, aua a leai se ie e auau ai lau sii i le faalavelave o lou aiga e mataga atoa mea na e te faia. O le mea la lea, o tatou nei o lo o ua to mai i ai le matupalapala ua to mai i ai mamalu e oo a i luga i ao o le lagi o itumalo o tupu ma ee lea ua i o outou tauau, aua le tuua le tuualalo e ave i tatou nuu. Lagolago malosi i le polokalame lea, leaga o lea faatoa ausia lava lea o le faalupega sa tatou pepese ai i ia aso o measina a Samoa, ae aumai measina e afifi mai tai sefulu ae tatala atu e ai uma e isumu ula o ie, se i tulou lava le faafogafoga mai a le atunu ma le faafogafoga mai a lau Afioga ma le tatou Maota nei, a o mea mananaia ia, o mea ia e tatau ona tatou agai e faaleleia.

Malie lau Afioga i le Minisita o Tupe, o le taua ia o le polokalame lea. O lou manatu i le polokalame lea, ia fai lava ia oo i le faavavau leaga o le aganuu a Samoa e le o se aganuu e fai fai ona muta lea, e faaauau, ma e tatau lava ona malie lau Afioga, o tupe alu lelei ia, tusa lava pe vaai mai atunu i fafo o le matua faavalevaleda o lea ituaiga polokalame, e nofo le Malo ma ave tupe ma loomatutua e lalaga ai latou ie e fai ai latou faalavelave, ae leai se mea a le Malo o maua mai ai. O le mea la lea, malie lou loto ia tau talatala mai lou finagalo, faaauau le tatou polokalame.

Lau Afioga i le Fofoga Fetalai, o lou tulai atu lena. O le taua o le lauga a le sui usufono, e faatupu manatu, tuu mai ai ma le avanoa matou te tutulai atu ai e tatala atu le tulaga o faavae e fai ai nei atinae taua. Na pau lava upu ia e fai e le vaega foi lea a le tiapolo, o le malo corrupt, o taitai corrupt, o le kabeneta e corrupt. Ou te le iloa po o le a le uiga o lena upu, a o mea ia e le faia e ni tagata e corrupt. Lau Afioga i le Fofoga Fetalai, o si au toe faaopoopo atu lena i le sui usufono ma lana saunoaga.

**FOFOGA FETALAI:** Tulai mai le sui usufono mo Palauli le Falefa.

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai, faafetai foi i lau Afioga i le Palemia. E pei lava ona avatu i le sini autu o le tupe, avanoa tutusa. O lona uiga, tasi lea ituaiga employment indirect ua tatou tuua ai ni tupe i tagata ua le mafai ona maua ni galuega, a o la e ua faigaluega i tua ma tautua mai le Malo i le faaaogaina o taimi e lalagaina ai measina a le atunu. E pei o le ala lea, ae faafetai tele o lea ua atili malamalamai ai le faamoemoe, ma e tatau foi ona tatou o e opogi ma fai nei atinae mo le manuia o Samoa, aua o i foi e tua i ai nai olomatutua ma toeaiina. E sao lelei le mea lea e saunoa i ai le Afioga i le Palemia i toeaiina ua fiu e faatali olomatutua, ia ua tai lua vайaso e le toe foi atu. Ia o le mea la lena ua fai ai foi le faaiuga o le a soloia le falelalaga, a o la e aumai, e tele foi ie a le matou itumalo o la e aumai. E popoto lava olomatutua ua amata foi ona sui le latou... ae manaia pe a faatetele prices, tuu i ai se \$5 miliona ona pule ai lava lea o... o lea foi o le a ou alu ou te nofo ai i le komiti lea e Taitaifono ai le Afioga i le Palemia, ina ia mautinoa lelei, e aofia, so o se mea a ou te alu i ai, o le a promote ina a le ie Samoa. Lalaga le ie Samoa. Ma le faaaloalo lava.

20 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)**  
**2018/2019 & Tulafono Tau Faaofi o le Faatatauina o Tupe 2019/2020**  
**– felafolafoaiga i luga o le faitauga faalua**

Faafetai Tuilaepa i le faamalamalaga o le vaega lea...

**Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi:** E i ai a si mea o le tuualalo, ia manatua foi o le galuega a le Malo na ona faamaite ona taoto atu lea e fai le isi anava masani a Samoa, o le mitamita i lou nuu, mitamita i le mama, mitamita i le tautaua o le faimea lelei, mitamita i le tautaua e tau leai ni tagata fai mealeaga o lo o nonofo ai. O le mea la lena o polokalame uma a ia a le Malo, pei na ona faamaite i sina mea mama foi lea o seleni, ona tuu a lea o latou e o. O lona uiga na o le pau a le mea o le faamanatu o tatou tu ia ma tatou aganuu sa tatou masani ai.

O lea ou te manatua le taimi sa ou laititi ai au, o le faasoesea ia o apa e tata i taeao o Aso Gafua, atigiapa foi nei pusamasi mai Fiti sa aumai i apamasi i aso la. E ala a la tina o le nuu ona o ane loa lea tata faasoloatoa ona fafagu uma ai lea o loomatutua, o le taimi lea e faamama ai le aai, vele ai le vao a o le i oso mai le la. O latou mea ia sa fai e pei e mitamita ai. O le faaeteetega la lena i le Malo, ina ne i te i ua pupu tele i tupe e avatu ona galo ai lea o mea ia ae peiseai a le avatua le tupe ona le faia lea, ona galo ai lea o le tu ma le aganuu matagofie lea. E i ai le taimi sa fai ai le isi polokalame lelei lava o lea ua o atu le Malo e fau auala galue, uma loa auala galue lafo loa i le nuu e o latou e faamama, ae avatu la, o lea ou te tau manatua pe afe ea le tupe na avatu, pei o se incentive o se tupe foi lele, leai e pei lava e tolu afe, pei se faamlosiau e avatu i le tausaga, e faamlosiau i le pulenuu ma taulelea e o loa latou e faamama le auala galue, aua manatua foi a uma ona faamama le auala galue, o le mea la e fai e le nuu, o le o ifo e sasa le auala aua ne i sosolo mai le vao i tua ma ola ai loa ma taetae ai loa ma ta ia na o atu le Malo fai e faafaigofie ai ona o i uta taavale afi.

E i ai la le aso na tufa ai le matou tupe, a o lea ua ou saofai ai, ou vaai atu, se na ona tufa atu lava i taulelea ou vaai atu i fafo ua fai mai ai latou taisi, fai mai ai latou poka, a o isi ua o aumai pia inu mai fafo a o lea ou te tilotilo atu i ai, ae lauga mai loa le isi matai ma fai mai, ua fai lava sina tuai Tuilaepa ona aumai le tatou seleni, o le mea lea a toe tuai e sili ai loa ona aua le toe.... ae faaola ai le vao. Ou otegiaina loa ma le matai, ou fai atu, e te iloa le mea, o tala mai a isi faipule ia e fai mai ia te au, o le mea foi lena o la e fai e latou. O le vaiaso na sosoo ai na ou sau ai loa fai le fono a le Kapaneta muta ai lava i ina ma le tupe lea, e le i toe avea i tua, na ou otegiaina ai ma le matai lea. Oi e omai le Malo e fau le tatou auala ae toe omai le Malo e totogi ma aumai tupe e uunai ai tatou tatou te o e faamama le auala ae fai mai ituaiga upu faalelelei faapena? O le mea la lea e faaeteete i ai le Malo, e faaeteete i le soona tago i mea ia, ona uma ane lea ua avea ma mea e oti ai le polokalame lea ona ua le vaai o tatou tagata i le itu lelei ae ua amata ona vaai, e pei e foliga mai a le avatua se tupe pe faatele se tupe, a ua taofi loa ma le polokalame pei o se polokalame foi lea na o le Malo e manuia ai, ae galo ai o polokalame lea e fai e le Malo mo le manuia o aiga uma o le atunu.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faiataga faalua**

Lau Afioga i le Fofoga Fatalai, o si au faamalamalamaga lea, ona a le faia nei, ma le lilifa i mea ia o faatosina tupe ona tape ai lea o le agaga atiae lelei e tupu ae i o tatou tagata, e tatau foi ona fai sou sao e faaleleia le tou nuu ae le o le faalagolago mai a le avatua e le Malo ua faaleaga loa, a o ai la e mataga ai? E mataga ai lava le nuu. O galuega a le Malo lea e fai, na ona faamaite ina ia uunaia ai e afioga i le pule mamalu a alii ma faipule ma le tuualalo a tatou nei o faipule o le Maota o lea tatou te malamalama i le faavae o polokalame a le tatou Malo.

**FOFOGA FETALAI:** Malo faafetai, o lena ua manino le... Se i tulai mai le sui usufono mo Vaimauga Sasae.

**Afioga Sulamanaia Fetaiai Tauiliili Tuivasa (Vaimauga Sasae):** Lau Afioga i le Fofoga Fatalai, na ona sina fesoasoani atu lava i se mea fia faasao ona o le saunoaga a le sui usufono o lo o saunoa nei. O le tulai atu ona o le saunoaga foi a le sui usufono o lo o maua ai alo ma fanau ia e tai 11 tausaga lea e o i falelalaga, e pei o lea e... ona o lea e i ai i lenei komiti, o le mea lena e ese le manaia o nei mea o lo o matou i ai o komiti ona sa tautino foi le Ofisa Sili o Pulega o lenei Matagaluega, o taimi ia ua uma ai le aoga e faatino ai le auaunaga lea a alo ma fanau. E pei leaga o lea e pei e lilifa le finagalo o le toeaina ne i te i ua avesese i le atunuua le toe fia o ai i le aoga ae encourage e o i le falelalaga lea a o la e laiti le tulaga lea.

O le lua o le fia faafesili i le sui usufono ona o lea e lotea le falelalaga, a o lea e matau e lenei sui usufono pe faapefea la ona faatino le falelalaga a o le itumalo lea na teena le Matagaluega lea o Tina ma Tamaitai na o atu e faatino mea e faalauiola i totonu. O fea la e faatino ai le falelalaga a o lea e teena le Malo e ala i le Matagaluega lea o Tina ma Tamaitai, o lo o o atu i totonu o lona itumalo e faatino ai le faiga o le falelalaga ma faatino mea na. E pei o sina fesili lea leaga o lea e faalogo le atunuua a o lea e teena foi e le afioaga o le sui usufono mamalu nei ma lona itumalo le o atu o le Matagaluega lea leaga o lea e alaala mai le Matagaluega. E pei o sina fesili lena e tuuina atu i le... o fea la e fai ai le falelalaga?

**FOFOGA FETALAI:** Malo faafetai. Ia se i saunoa atu le Palemia.

**Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fatalai, e aoga foi le faatupu manatu o le mataupu lea leaga o lea e aafia faiga faavae a le tatou Malo, e tatau ai foi ona avatu sina fesoasoani i le vailiu lava lea e faasino i le taumafai o isi foi tina e pass on le knowledge. O lona uiga e aoao fanau i le lalagaina o measina, ae le gata foi i lena o le gaosiga foi o le siapo.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faiatuga faalua**

Ou te faafetaia aiga, o tina foi o lo o latou faia mea nei, e le faapea foi o faia i le taimi o aoga, a o la e i ai taimi i le po e mafai ai ona faataitai e le tina i le fanau, ma ou te lagona o se tasi lea o mea lelei o lea e fanau mai i i i le polokalame lea a le Malo, o le solisoli muliaao o le fanau i mea o lo o faia e matua. E le gata la ina silasila i polokalame ia o lea ua fai le sao o le fanau laiti e aoao mai o latou tina, ae le gata i lena, a ua taofia ai ma le tama i le savalivali solo ma tafaovale, a o lea foi ua lalaga ie foi ma le tama ia, ona ua na iloa e feololo lava si seleni e maua mai i, e inu ai lana pia ma ula ai lana tapaa.

E pei la o nai itu taua na o le pass on o le knowledge i fanau laiti, aua o aso nei, o le tele a o le fanau a aoao atu a ua le toe fiafia i mea ia, ae ou te faafetaia le polokalame lea ua mafai ai ona aoao e tina fanau i le tomai lea semeamanu e mou atu pe ana leai le polokalame lea a le tatou Malo. E i ai foi la isi mea ua lipoti mai, ae lipoti mai lava pei e faatalasua e isi foi fanau talavou. Fai mai le lipoti ua oo mai, ua faatalanoa isi tupulaga talavou ae fai mai le tala a isi autalavou, o le mea lena na ala ai ona le lelei a matou aoga. Ua taofi matou e o matou matua, o lea faatoa limasefulu tausaga ae fai mai e nonofo ia i le fale e tausi laua ua matutua. E aoga la mo Fonotaga faapenei, o lea la ua faitio lea fanau laiti, sa fia aooga ae ua taofi e matua. O le taua foi lea o tatou Fonotaga lenei, e tasi lea tiute e tatau ona fai i fono a tina ma fono a tama. E tatau ona matua faataua e sui o le Malo, ona laga i le fono a Alii ma Faipule, e tatau ona fai ni Komiti e o e asiiasi ituaiga matua ia e o e fai ituaiga mea ia. Aua e tasi lava le tamaititi e tuufau ma ola le taupulea, ae fai ma sasa i le pulega mamalu a Alii ma Faipule i le lumana.

Lau Afioga i le Fofoga Fetalai, o le tamai mataupu lena e faamalamalama atili.

**FOFOGA FETALAI:** Malo faafetai,

**Afioga Salausa John Ah Ching (Faleata Sasa):** Lau Afioga i le Fofoga Fetalai....o se mea e fia faaopoopo e faamalamalama faamolemole.

**FOFOGA FETALAI:** E faamalamalama e oe le faauilavea a le Palemia?

**Afioga Salausa John Ah Ching:** E leai e, i le faamalamalama e faaopoopo i le saunoaga a le sui usufono mo Vaimauga. O le faamalamalamaga e faaopoopo i le saunoaga a le sui usufono mo Palauli le Falefa. E taua pea le mea lea o lo o taua ai le fanau aoga.

**FOFOGA FETALAI:** E ui lava ina le aiga mea, ae se i tuu atu pea le avanoa. Faapuupuu mai.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**Afioga Salausa John Ah Ching:** Leaga sa ou i ai i le faalelegapepe lea na uma atu nei, o le tamaitai talavou lea pe sefulufa tausaga lea na maua lana faailoga faapitoa o le ie numera tasi, e mai i Nofoalii. Na alu atu lava si tamaitai lea ma ana toniga aoga. O le mea lea sa ou iloaina ai o la lava e faaauau le aoga a le tamaitai lea, faaopoopo ai ma le taleni lea ua ao i ai e lonta tina. O le mea lena... ne i te i ua faapea tatou, e faamalosia ai, ia ave pea tamaiti i le aoga ma fai lava ma le isi aoga lea o lo o aoao i ai matua, faafetai mo le avanoa.

**FOFOGA FETALAI:** O fea le afioaga le sui usufono mamalu?

**Afioga Salausa John Ah Ching:** O Nofoalii.

**FOFOGA FETALAI:** Leaga o tau Aana na e... Alofi o Aana, amata atu lava i Faleasiu, Fasitoo, Nofoalii, Leulumoega o Alofi o Aana uma lena. O lea la e i ai le tomai lea ma le...

**Tofa Ili Setefano Taateo Tafili (Aana Alofi Nu.2):** Lau Afioga i le Fofoga Fetalai.

**FOFOGA FETALAI:** Se i tuu atu la i le sui usufono mo Aana Alofi Nu.2.

**Tofa Ili Setefano Taateo Tafili:** Faafetai lava mo lou avanoa. Ne i matau mai ua ou saga nofo ae o lea ua taua lo matou nuu. E pei ua leva lava ona fia piiama i le mataupu lea, ae sa manatu foi e le faalavelave i le lauga a le sui usufono mo Palauli le Afioga ia Faumuina. O le atugaluga lea sa i ai i le isi vaega faapea ua le alu le teineitiiti i le aoga ae lalaga le ietoga. E leai, o taimi lava ia ua avanoa o lea e faatino ai le galuega lea, ne i i ai se atugaluga faapea ua lalaga le ietoga ae le aoga. E pei ona talatala atu, o le aso lea o le faalelegapepe, o lea sa oo mai lava le teineitiiti lea ma ona ofu aoga i le faalelegapepe. O lea le fesoasoani atu ma le agaga faaaloalo. Ae o le teineitiiti, e sau mai Nofoalii. Ma lou faaaloalo faafetai.

**FOFOGA FETALAI:** Malo faafetai. E leai o lea lava e manino le folasaga a le Palemia, o ituaiga tomai ia e manumanu le Palemia ma le Malo i mou atu, i latou e mafai ona faatinoina, measina ia a le atunu. Ae amuia Nofoalii aemaise foi o Aana Alofi o lo o faapena ona tauave pea...

**Susuga Hon Tuilaepa Auelua Fatialofa Luplesolai Lolofietele Neioti Aiono Galumalemana Dr. Sailele Malielegaoi:** E pau lava le mea e taua tele lo tatou Fono lea e fai i le aso. Ae lelei na o se tuualalo, aemaise lava la outou fuaiala i o i lo tatou nuu o Fasitoo. E a pe a talanoa atu i lo outou fuaiala. Soia le aumai soo o le mataupu lea i totonu, o lea ua malamalamama aua e fai loa le tatou fono ona faapea lea o le lauga a la outou fuaiala e nofo i luma.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Se ua na o le pisi o le matou fuaiala i le fai ma o mai Nofoalii e fesili mai pe faapefea ona fai le mea lea. Se fai ia i la outou fuaiala e soia le gugutu soo i lo tatou nuu.

**FOFOGA FETALAI:** E moni le saunoaga a le Palemia, aua o le lauie la e lalaga ai Nofoalii e avatu i Fasitoo. Tulai mai le sui usufono mo Palauli le Falefa.

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai, faafetai foi mo faauilavea. E le tetena ai se... o nai sui usufono fou ia o lea e tau aoao. E leai ni faleaoga e tatau ona aoga lelei ai. Mo le silafia, e fai lava le falelalaga o le afioaga ia. E le i teena e lou itumalo se mea....e pau lava le mea la e manao ai le itumalo, ia mafai ona fesootai ia atinae a le itumalo, ina ia aua ne i fesopoai. Na pau lava lea o le mea...e le i talanoa le itumalo, i ana atinae e tatau ona faatino. Ou te faafetai atu ai i sui usufono sa faauilavea, ma e faamalo faafetai.

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai, o se mea e tau faasao. Ona o tatou faamaumauga ia e i ai e le matagofie le saunoaga a le sui usufono, o sui fou e tau faataitai. E leai e o mai lava sui usufono ua agavaa, o lauia foi mea nei e aumai i totolu e itumalo. E pei o le agaga lena o lea e tau avatu ai lo matou manatu. A faapea e teena e tatou ma le lagolagoina e tatou le Malo e o atu i totolu o tatou afioaga, e faapefea la ona fai galuega a lo tatou Malo. O le mea lena o lea sa avatu ona o lea na agiga lava i totolu o le atunu, le itumalo o le sui usufono lea. Ae aveese ia saunoaga, o sui usufono nei e o mai o lauia sa filifilia.... o le mea foi lena na ala ai ona o mai o la e i ai faatuatuaga o le itumalo. Ae aveese ia saunoaga i tatou faamaumauga ma le faaaloalo lava.

**FOFOGA FETALAI:** Tulai mai le sui usufono mo Palauli le Falefa e faaauau le saunoaga. See ese ia mai le tulaga lea lau Afioga. Ae le o toe umi foi lou taimi.

**Afioga Hon FAUMUINA TIATIA FAAOLATANE LIUGA:** Faafetai atu i lau Afioga i le Fofoga Fetalai mo le avanoa e fai ai se sao. E i ai ia.... sa taua i le aso ananafi ia le tulaga lea... o lau tuualalo i le tulaga lea ua faamatuu atu ai ia nisi o auaunaga i isi Matagaluega.

O le faamatuu atu o le PUMA i le Matagaluega o Galuega, e sao lelei. O le tuuina atu foi o isi Matagaluega i le tulaga... i le vaega lea o le LTA. O le LTA e tatau ona aveese ia le vaega lea e vaaia tulafono lea e regulatory lona function. O lona uiga a ave uma ma le transportation, ua conflict of interest.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O le tulaga lea faapea leaga o tupe, e le o le mafuaaga lena e tatau ai ona consider le vaega lea. A aveese loa le transportation, ua le iloa la le mea ua tau ai le LTA, o lona uiga o le Construction Authority. Aua o le travel lava ia, e lua ona vaega, o le faiga o le Tulafono e taitai lima ai, e pei o le traffic, regulator le Komesina o Leoleo. O le Construction e regulator le CEO o le Minisitry of Works. O lona uiga a aveese loa le vaega lea e pasia taavale, laisene taavale laisene avetaavale, ma siaki uma le fitness. O lona uiga e ave loa i leoleo, ua conflict of interest foi le mea le la. I le tulaga lea na i ai sa conflict of interest, a o i ai i le LTA, e regulate toe operate. E tatau lava ona tuu le operation i le LTA ae ave le regulatory function i leoleo. O le tulaga foi lea lau Afioga..... aua o lona uiga e aveese le transport i le tulaga lea pe a ave loa i o i le Matagaluega o Leoleo. Ao le tuualalo, e manaia pe a toe silasila le Kapaneta i lana faaiuga pe talafeagai.

**FOFOGA FETALAI:** Se i tulai mai le faauilavea a le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr.Sailele Malielegaoi:** Lau Afioga i le Fofoga Fetralai, o le mea lenei o Faigamalo o lo o tatou alu ai, o mafaufauga faamalo i fafo. O Faigamalo ia faaleatunu, o totonu lava o le lotoifale o le nuu e faatino ai ona upu fai i alii ma faleupolu, ma alu atu le faatonuga i taulelea i le mea e fai. Ao le Faigamalo lenei tatou te fai malo ai, o lo o taumafai tatou te tilotilo i tu ma aga o lo o faatino ai Malo i fafo, ona tatou faataitai lea i ai. Ae afua foi i le tele o manatu a i latou e i ai tomai faapitoa.

O le clash lea o lea o lo o i ai pea, o tomai mai fafo ma mafaufauga faasamo. E masani ai tatou o lea e tausi nuu. O le tele foi o matai ia e feoai nei, e o a foi isi matai o la e faamasinoina mataupu tau le aganuu, e le o atu i ni fono a nuu. E le saofafai i fono a nuu ma iloa ai tu ma aga moni a Samoa. Ao le toatele ia o le mau polofesa ia e tusitusi i tu ma aga a Samoa i le faalogo ae leai se poto masani. E saofai lava i totonu o fono a nuu, ma silasila totoa i le faatinoga, o le tatala maiga o le tofa teu mau ma le faautautaga oo oo. O le mea na tatou sau ai i le lalata i le 4,000 tausaga talu ai. Afai o lea e oo mai nei, o lea e ola ma malosi tu ma aga a Samoa. O lona uiga o la e tele le aoga, aua ana le faaaogaina na tu ma aga, masalo e leai se Samoa e soifua mai i le taimi lenei, ua feoti uma lava i taua ma tulaga faapena.

O le mea la lea e fai e tatou o le taumafai, e i ai lava le manatu malosi lea, tuu ese le regulatory, pe a tuu ese le vaega e faatino, o manatu na faapapalagi, o manatu na o lea e faataoto mai i isi fuafuaga. Tatou te taumafai atu i lea mea, e pei la o le falemai, tuu eseese o le a le mea na i ai? kua oki ia le auaunaga. E i ai lava mea tatou te ta i ai, e alu atu patonu lelei. Ae i ai isi suiga, a tatou vaai atu loa o lona uiga e le o talafeagai le taimi, toe vave ona toe sui kia, ne i te i ua tatou pau atu lava i le faaletonu.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Lau Afioga i le Fofoga Fatalai, o le tulaga lena. E le o i foi Tuivalea e vaai atu lava i le alu faaneionapo o a tatou suiga, ae vaai atu ua oti ai le faagasologa o galuega ae faaauau lava. O isi fai mai se i.... ua 10 tausaga, toe onosai mo le isi 10 tausaga. E le mafai na onosai le Malo i faaletonu ia e vaai atu i ai.

Lau Afioga i le Fofoga Fatalai, o le tulaga lena. E aoga i atunu e fia afe ma afe ma afe selau afe tagata poto faapitoa. A tuu mai loa i le atunu lenei o lea e tau filifili aemaise le poto masani ma le faamaoni, ona vave loa lea ona toe fetuunai. O le a le upu e faalogo i ai tatou i lauga i le pulelaa ma lauga tu tootoo, o le uta a le poto e fetala'i. A sui ae vaai atu e le lelei le sui, toe sui i tua le kia.

Lau Afioga i le Fofoga Fatalai o le tulaga lena. E i ai lava le taimi e alu atu ai le suiga ua talafeagai. A avatu loa e le o talafeagai, e i ai foi isi upu a le atunu, e le uma le fai aso o le Atua. Lau Afioga i le Fofoga Fatalai, o le fesoasoani atu lena. Alu ese ia ma lena mataupu, ae avatu nisi mataupu.

**FOFOGA FETALAI:** Ua ou manatu o lea ua saunoa le Malo i mafuaaga e faapena lava. Saunoa foi le sui usufono mo Palauli le Falefa, o lou lava lea finagalo. Ao lea ua manino le saunoaga a le Palemia. E i ai le manatu e see atu ia e faauma mai lau saunoaga, ua toe 2 ou minute.

**Afioga Hon FAUMUINA TIATIA FAAOLATANE LIUGA (Palauli le Falefa):** Faafetai i lau Afioga i le Fofoga Fatalai, ia ua uma atu foi ia le tulaga lea le lauga e lagolago ai le Tala o le Tupe, e matua lagolagoina e lenei usugafono le Tala o le Tupe. Faafetai tele i lau Afioga i le Minisita o Tupe. Faafetai foi i le Malo e pei foi ona muai fai atu, faafetai mo galuega lelei, ia si ou itumalo, faafetai mo le tapuaiga, faafetai i le lavapapale mai ma tui mai le mulipapaga, ia e fai ai se sao o le tatou itumalo, i le atinaeina o si o tatou atunu.

Lau Afioga i le Fofoga Fatalai, ia faamalo, faamalo le tauatai, faamalo foi i lau Afioga i le Palemia ma le Kapaneta, mamalu o lenei Palestine, manuia Samoa. Soifua.

**FOFOGA FETALAI:** Malo, faafetai, ia ou te tapa ma le faaaloalo lau Afioga i le Taitaifono o le Komiti o Tupe.

**Afioga ALIIMALEMANU ALOFA TUUAU (Taitaifono, Komiti o Tupe Maua ma Tupe Totogi, Alataua Sisifo):** Faafetai mo lou avanoa, ia faatalofa atu i lenei taeao matagofie, lau Afioga i le Fofoga Fatalai o le Maota, lau Afioga i le Palemia, Afioga i Minisita o le Kapaneta, ia faapea Afioga i Minisita Lagolago, liliu mai foi i lenei itu o le Maota i Taitaifono ma Sui Taitaifono o Komiti Faa-Palestine, ia faapea sui usufono mamalu o le Maota Fono.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Ia e le gata i lea, o Ofisa Sili o Pulega ma Matagaluega ma Faalapotopotoga, ia o auauanga eseese o lo o tautuaina le atunuua ua mafai on tatou faatasi i lenei taeao, ia aemaise lava Samoa o lo o faafogafoga tapuai mai. Faatalofa atu foi i lou itumalo, le Alataua i Sisifo.

Lau Afioga i le Fofoga Fetalai, ou te tulai atu ma le ava tele, e fai se sao o le Alataua i Sisifo i le Tala Faaopoopo lona Lua o le Tupe o lenei tausaga, faapea foi le Tala Faatatau o le Tupe 2019/2020 ia ona muliai lea o se faamatalaga i nisi o mataupu sa laga i le ripoti a le Komiti o Tupe.

I lau vaavaai atu i le Sini Autu o le Tala Faatatau o le Tupe fai mai, ia autasi le vaai taulai, mo se manuia o Samoa. Sini Autu lena o le Tala Faatatau o le Tupe lea ua opea i Maota. E tofu lava sui usufono mamalu o le Palemene ma lona faauigaina o lea fuaitau. Ae mo Lealataua Sisifo lava ia, o lona faauigaina e faapea, ia tasi le faamoemoe o galuega uma, o lo o taumafai atu i ai, ina ia manuia Samoa. E le mo na o nei, ae mo tupulaga fai mai. E faafefea ona faatino ia tasi le faamoemoe ina ia manuia lo tatou atunuua? E ala i le galulue faatasi o so o se itutino o Samoa atoa.

E amata mai i Taitai o Eklesia, e o lo o faanonomanu i le ao ma le po, ina ia manuia Samoa. E amata mai i Taitai o le atunuua, e o lo o faia upufai o le atunuua e o lo o faia le Malo, e amata mai i le Malo, e o lo o faafoeina le sa o Samoa, mo le atinaeina o lo tatou atunuua, e amata mai i Ofisa Sili o Pulega o Matagaluega ma Faalapotopotoga seia oo lava i auauanga lautele. E amata mai i Kamupani ma Sosaiete eseese, e amata mai foi i le Pulega a alii ma faipule, e o lo o faamoemoe i ai le toafilemu ma le manuia i totolu o nuu ma afioaga.

O le matua alofa, e le mapu le faatonu, e tapena le fanau e le gata ina ia ola ae i le olaga taupulea, ae ia manuia ma ia aua ne i ola faalolo fanau, pe a uma atu matua se i tulou le gagana. Ou te talitonu o le auga atoa lava lena o galuega a le Malo, ma le Palemene ma lana vaai taulai, e pei ona i ai le sini autu o le Tala o le Tupe. E uma atu o tatou taimi, ae ua tulai mai Samoa o se atunuua manuia, o se atunuua saogalemu, ma se atunuua toafilemu.

Faafetai i lau Afioga i le Minisita o Tupe, ua le faapito manu ia tasi. I le vaaiga lautele i le Tala Faatatau Autu o le Tupe 2019/2020, lea o lo o faapea, o le tupe pau le 61.4 miliona. Atonu o le tulaga lea o lea e taua ai le le paleni, ona o le tele o tupe faaalu, nai lo tupe maua mai. Ai ona o le upu pau, deficit, lea e pei e i ai se faauigaina i lona uiga negative. E pei e foliga mai e gau, leai e eseese mamao upu ia e lua, pe a faaaoga i Tala o Tupe. O se faasiliga o tupe alu na i lo tupe maua, i se Tala Faatatau o Tupe, po o le Budget, e i ai ona itu taua ma ona itu lelei.

Muamua, aua e uunaiina ai le aufagaluega e ao mai tupe e tatau ona maua i totolu o le atunuua, lea na taua e tele o sui usufono le taua a le Minisita ma le Ofisa Sili o le Matagaluega o Tupe Maua. O lona lua, o le tele o tupe faaalu, aemaise lava mo atinae, o tupe aoga na, aua le siitia o le tamaoaiga. O lona tolu, e fuafua tatau ai tupe faaaoga, ae agai tonu pe focus i le atinaeina o le atunuua.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faiatuga faalua**

O lona fa o le taua o ituaiga budget nei faasili o tupe alu na i lo tupe maua, e toe tomanatu ai le aufagaluega, a o le i faaaluina tupe, pe manaomia le faaalu o tupe, pe toe fetuunai resources.

O le masani la a atunu i le tapenaina o Tala Faatatau o Tupe, pe a sili atu tupe alu na i lo tupe maua, ia o le sii lea o lafoga. Ae leai se tulaga faapena o tupu mai. Ae ua i ai le talitonuga o le Ofisa Sili o le Matagaluega o Tupe, faapea le Ofisa Sili o le Matagaluega o Tupe Maua, faapea le Ofisa Sili o Matagaluega o Faalapotopotoga a le Malo, faapea le Ofisa Sili o le Ofisa o le Pule Faatonu, ma nisi o tatou auaunaga, e paleni ae lava le tatou Tala o le Tupe, i le uma o le tausaga faaletupe o lumanai nei. Aua foi o le latou galuega faatino lea o le a alo atu i ai, aemaise le usitaia po o le compliance, e kamupani ma pisinisi ma tagata taitoatasi, le totogiina o lafoga ma tiute. Lea foi sa taua e nisi o sui usufono ia fuafuaga lelei a le Malo, i le faaleleia o le system lea o le a ao uma mai ai tiute ma lafoga, na ona fai lava o lau faatau, maua mai i tai e le Ofisa o Tiute le aofai o lau faatau lea na fai i se faleoloa. Faafetai mo ia auaunaga o le a faatino. Ua le gata la i le Matagaluega o Tupe Maua, faapea le Matagaluega o Faalapotopotoga a le Malo, o le Ofisa o Pule Faatonu aua o lo matou matau lea, i le lauliliuina o le Tala Faatatau o le Tupe i le siitia o tupe maua, sa latou aoina i le tausaga lea o le a mavae atu, ma o lea ua faaaauai e pei ona taua e le Sui Taitaifono ia isi foi luitau, luitau lelei na, e tuu atu i ai latou, ina ia taumafai pea e aoina mai ia tupe maua i totonu o la tatou lava atunu.

O Tupe Faaalu, e pei ona taua e se lauga ua tuanai atu, e ono lava ia faiga faavae tau tupe a le Malo e fua i ai le tapenaina o le Tala Faatatau o Tupe. O Tupe Faaalu, o lea o lo o sosolo lava i luga o faiga faavae a le Malo lea e tatau ona i le va o le 35% ma le 38% o le tamaoaiga le aofai o Tupe Faaalu, lea sa maua lelei mai lava e le sui usufono mo Salega Sasae, 2.2 piliona le tamaoaiga. A fua la i ai le pasene o Tupe Faaalu, o la e sosolo lava i totonu i ina, i le vainiu lena ia le aofai o Tupe Faaalu i le tausaga lea o lo o lumanai nei.

O lona 2 o le itu taua, faiga faavae, ia faatumauina i lalo ifo, o le 50% o le tamaoaiga le aofai o aitalafu ma nonogatupe a le Malo. Ia e leai lava se eseesege o mea ia ma a tatou lava nonogatupe. Mo se faataitaiga, o lea foi sa saunoa ni isi o sui usufono, e leai lava se eseesege pau lava le eseesege o le tele o tupe a le Malo, ia ae laiti ia tupe a le tagata lava ia po o lana pisinisi. Afai o la e i ai lou fanua e \$200,000 le tau market value ae ou alu atu i le faletupe e fai mai sau nonogatupe, e pau lava le tupe e mafai ona aumai e le faletupe 50% o le tau o lou fanua. O lona uiga e na o le \$100,000 le tupe e mafai ona ou nono mai. E faapena tonu lava le faaaogaina o le faiga faavae lea, lea e faaaoga nei e fai mai ai ia nonogatupe a lo tatou Malo, aua le atinaeina o le atunu.

20 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O le galuega taua lena a le Matagaluega o Tupe ma e o lo o latou faafoefoeina, ma le Central Bank ina ia aua lava ne i sili atu i luga i le 50% lea i le taimi o le faamatalaga o tupe na tuuina mai i le 2017/2018, na e matau atu i ai, o lena e 47% o le tamaoaiga na ua alu ifo ai i lalo a tatou nonogatupe. E leai se isi tala e toe faia, ou te iloa ai seiloga ou te faa-Initia atu ona faatoa malamalama lea i lea tulaga.

Ae o lona 3, o totogi o tagata faigaluega, ia i le va o le 40% i le 45% ia le aofai o tupe faaalau. Ou te talitonu o le tulaga foi lea na ala ai ona fai le siitaga a le Malo, ina ia ausia lava faiga faavae ia e tapena ai le Tala o le Tupe, lea e ausia tonu lava le va lea mo totogi o tagata faigaluega.

O lona 4, ia faatumauina i lalo ifo o le 2% o le tamaoaiga le faasiliga o tupe faaalau. O lo o sosolo ai foi i ina tatou i le tapenaina o le Tala o le Tupe. Ia ma le faaleleia o galuega faatino a le faalapotopotoga aua le faamama avega i le Tala o le Tupe. Ia ae la lea e matau atu i le Matagaluega o Faalapotopotoga a le Malo, lea sa tuu i ai le \$5 miliona latou te aoina mai i tupe foi ia o tupe faasili po o dividends, ae o lea e matau atu e \$13.5 miliona lea ua mafai ona aoina i le masina lea na tea nei, malo galulue.

Ia ma le lona 6, ia siitia le aoina o lafoga, ia o faiga faavae na tau tupe a le Malo, o le aoga foi lena o le aumai o le Tala Faatatau Autu o le Tupe i le Komiti o Tupe, aua foi latou te siakiina lelei ai galuega a le Malo, lea la matou te faapea atu, o le Tala Faatatau Autu o le Tupe, o lo o sosolo pea i faiga faavae ia na tatou pasiaina mo le tapenaina o Tala Faatatau o le Tupe. Se i ou toe faatepa tasi lava le Palemene i Tala Faatatau o Tupe o le paeaiga lenei. I le tausaga faaletupe 2016/2017, o le Tala Faatatau Autu sa i ai sa \$14 miliona ia tupe pau, tau atu ia i le gagana faigofie, deficit, ae ina ua aumai ia faamatalaga o tupe, o le a le mea na tulai mai? \$59.8 tupe mama na mafai ona maua i lea tausaga, 2017/2018, Tala Faatatau Autu o le Tupe \$92.3 miliona, tusa o lea foi na fuafua i lena tausaga e sili atu tupe alu na i lo tupe maua. Lea ua tatou taulimaina le tala faatatau o tupe 2017/2018. O lea ua tulai mai \$29 miliona tupe mama po o tupe faasili, 2018/2019 o lea tatou te i ai nei, \$12.1 miliona tupe pau, ou te talitonu o lea e lelei pea le gasologa o le faafoefoeina o tupe a lo tatou Malo.

E momoli atu ai lau faafetai i Matagaluega uma a le Malo, Ofisa Sili o Pulega o Matagaluega ma Faalapotopotoga Tumaoti, i le tapena leleiina o le Tala o le Tupe. O le tele o le siitia o lo outou tomai lena ua i ai. E le gata i le tapenaina o le Tala o Tupe, ao le tapenaina o galuega faatino, ina ia ogatasi ma tatou strategies, po o a tatou goals. E le gata foi i lea o lo outou tomai ma le silafia lena ua i ai, i le taimi tou te tali mai ai i le Komiti, i le lauliliuina o Tala Faatatau o le Tupe, faafetai galue. O le agaga fiafia ia i matou uma lava, o le tele o le silafia lena ua i ai, ma lo outou galulue punouai aua se manuia o lo tatou atunuu. Aua o outou o le lumanai o Samoa. Tou te faaauauina galuega lelei lea o lo o taumafai atu i ai lo tatou Malo.

**20 IUNI 2019**

### **Lafo mo le Suia o Itula Fono**

**FOFOGA FETALAI:** Ou te vaelupeina le saunoaga a le Taitaifono o le Komiti ona o lea ua tatou taunu i la tatou malologa. Ou te faasilasila atu ua faataatiae Galuega a le Fono Aoao mo lana malologa.

*Na faataatiae Taualumaga a le Fono Aoao Faitulafono mo lana malologa masani i le itula 10:44 i le taeao ma toe faaaauau i le itula e 11:31 i le taeao.*

**FOFOGA FETALAI:** Ou te faasilasila atu ua toe amatalia Taualumaga ma Galuega a le Fono Aoao Faitulafono. E manatu ua maua se isi malosi faaopoopo i le paia o le Palemene aemaise le Palemia ma le Kabeneta faapea foi Ofisa Sili o Pulega o Matagaluega ma Faalapotopotoga.

Ae ou te muai tapa ma le faaaloalo lau Afioga i le Palemia mo se lafo.

### **LAFO MO LE SUIA O ITULA FONO**

**Susuga Hon TUILAEPA AUELUA FATIALOFA LUPESOLIAI LOLOFITELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, e taua tele ona fofoga foi le Maota nei mo le silafia. E i ai se tasi o a tatou atinae taua o lea ua maea faatino mo tatou taaloga. O se faletele aua le faamoemoe mo taaloga a le Pasefika, e tatala aloaia i le aoauli nei, ma e i ai le taofi, tou te fia matamata uma i ai. E le tatau ai ona tatou faaaauau la tatou Fonotaga ae tatou o lelei se i o tatou matamata i lenei foi atinae tele a lo tatou Malo. O lenei galuega tele o se vaega o le tapenaga mo taaloga o le Pasefika toe nei o ni nai aso, ona amata lea i le masina fou e faapei ona talimalo ai lo tatou atunu.

O lea ou te faatu ai le lafo ma le ava tele, *Ina ia tolopo la tatou galuega i le itula e 1:00 i le aoauli nei, ona tatou tauaofia ai lea i le itula e 9:00 i le aso a taeao mo le faaaauauina o a tatou mataupu totoe.*

Lau Afioga o le lafo faatu lena i le mamalu o le tatou Maota.

**FOFOGA FETALAI:** Malo faafetai, ua saunoa le Afioga i le Palemia ma faatuina le lafo ina ia faamuta la tatou galuega nei i le itula e 1:00, ma tolopo ai seja aulia le itula e 9:00 i le aso a taeao.

*Faaluaina e le Minisita mo Pisinisi, Alamanuia ma Leipa ma le Minisita mo Tina ma Tamaitai Atinae o Nuu ma Afioaga ma Agafesootai.*

*Na faamaonia le lafo.*

*Na toe faaaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu 2) 2018/2019 ma le Tulafono Tau Faaofi o le Faatatauina o Tupe 2019/2020.*

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

**FOFOGA FETALAI:** E faia la tatou malologa, o lo o saunoa le Afioga i le Taitaifono o le Komiti o Tupe. Ma le faaaloalo ou te tapa lau Afioga i le Taitaifono o le Komiti, o le sui usufono foi mo Alataua i Sisifo.

**Afioga ALIIMALEMANU ALOFA TUUAU:** E lagona ua matu le fau, ua saoialo foi le taumafataga, ua maua le isi faasiligamalosi i lau Afioga i le Fofoga Fatalai ma sui usufono o le Maota nei. Ae o le agaga fiafia ona o lea o le a laiti tatou itula o lenei aso. O lea la o le a faauma atu le lauga.

Lau Afioga i le Minisita o Tupe, ua tele lava ina folasia e nisi o sui ia manatu sa tau avatu. O le a le toe oo la i ai se faamatalaga. E pau lava le talosaga se i e tagai ane lava i auaunaga ia e ofoina atu. O auaunaga tau nonogatupe i nuu i tua, aemaise lava i Savaii. O financial services foi ia e o atu i nuu i tua, e faigofie ona maua nonogatupe. O le manaia o le convenient. Ae a oo la ina ao mai tupe totogi, aua e o atu lava i vайасо uma. Mo se faataitaiga mo le matou nuu, e o atu lava i Aso Lulu uma, e le mafai ona alu ese le van lea seiloga ua uma uma mai lava repayments e tatau ona totogi mai. O le mea e tupu, e o uma le Komiti a Tina e sue mai se tupe e faaatoa ai repayments, ia vaega e tatau ona totogi e nai isi tina.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi:** Se i faafesili atu lava i le Taitaifono.

**FOFOGA FETALAI:** Malie le sui usufono se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi:** Faamolemole lava po o le a tonu le Faalapotopotoga lea, o se faalapotopotoga a le Malo pe leai?

**Afioga ALIIMALEMANU ALOFA TUUAU:** Leai lau Afioga i le Palemia. Ae o le talosaga se i tagai ane i financial services ia e gasolo atu i nuu i tua. O le Rowlen... ua galo igoa o kamupani ia e gasolo atu. Ae pei o le agaga foi lea, e manaia o la e faamama avega, a o le mea lea e tupu ua faaopoopo ai ma le popole ma le stress. Aua foi e le alu ese le van seiloga e uma ona ao mai repayments ia, ae o le tetele foi o pasene. O le faataitaiga afai o sau loan e \$1,000. e \$800 e aumai ona toe totogi atoa lea o le \$1,500. le tupe e tatau ona e totogia atu i totonu. Ae o lea ua i ai ma le \$200 lea ua toese.

O le talosaga, se i tagai ane lava pe le tatau ona i ai se Tulafono e faatulafono ai ia ituaiga financial services, aemaise o le maualuga o pasene ia e totogi i nuu i tua. Atonu e talafeagai lava le open market lea e alu ai nei tatou i faletupe o fefaatauaiga, ina ia...

**Tofa Olo Fiti Afoa Vaai (Salega Sasae):** Lau Afioga i le Fofoga Fatalai...

**FOFOGA FETALAI:** Se i tulai mai le sui usufono mo Salega.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faiatuga faalua**

**Tofa Olo Fiti Afoa Vaai:** Faafetai atu lava i le Afioga i le Taitaifono i le mataupu taua. Na ou taua le mataupu lea i finance companies ia, e i ai foi o matou nuu o lou itumalo e fiafia tele i le vaega lea. E pau lava le mafuaaga la e agai i ai tagata i i, o le faigofie o le process. E compare la i ina i le process lea e faatino e le tatou Development Bank, aua e pei o le Development Bank lava lea e agai i tua, lea e susulu i ai le mamalu o le atunu. A o le interest foi la e tele, e pei la ua le avea se mafaufau o le mamalu o le atunu i le interest a o le process lava lea. O le faigofie ia ona fai o a latou nonogatupe. Pe tasi foi lena, se i tagai ifo ai le Afioga i le Minisita o Tupe i le Development Bank, faafaigofie mai. Ona gasolo loa lea i ai o lo tatou atunu, ae taumafai ifo le tatou Development Bank lea e tau faaletonu. Ma le faaaloalo.

**FOFOGA FETALAI:** E ao ona toe faaopoopo minute o le saunoaga faalauaitele a le sui usufono.

Tulai mai lau Afioga i le Taitaifono.

**Afioga ALIIMALEMANU ALOFA TUUAU:** O le a ou see ese ma lea mataupu, o lea ua maua tonu lava le auga o le talosaga. E momoli atu le faafetai i le tulaga lea ua agai i ai lo tatou Malo i le self insurance. E talitonu o lea e i ai le tulaga o le tau faagaoioiina. E avatu ai le agaga faafetai, ona e matauina pe lata i le \$4miliona se vaegatupe o faaalu i le tele o a tatou insurance, malo faafetai mo ia galuega lelei uma.

Ona oo mai lea o se faamatalaga i le Matagaluega o Fesootaiga, faafetai lava mo galuega ia o le digital TV. Ae faafetai foi o lea e maua o le a oo atu ia fesootaiga i tua i le tatou pou lea e i Mulinuu i se taimi lata mai. Ae pau lava le atugaluga lea e i ai, se i toe tagai ane lava, o tau lava lea o tatou fesootaiga i internet. Ou te talitonu ina ua uma ona fai le Tui Cable, o le tele ia o le capacity la ua i ai i totolu o le atunu. Ae maua e ala ona le taugofie le tau o fesootaiga, ona e fua foi i available services e mafai ona faatau e kamupani ia e i ai i totolu o le atunu. O la ua i ai le capacity, ae fua ia services o le capacity lea i tupe e maua e a tatou kamupani ia e i ai. Ia e na o se manatu, ae o lo o i ina le tofa, pe le mafai ona toe uunai mai nisi kamupani e i ai auaunaga ia i mea tau telefoni ina ia faataugofie ai faatauvaga, ma nisi foi o lo o tele ni a latou tupe e mafai ai ona faatau uma ia services ia ua available i i, i le i ai o le tatou Tui Cable ma mau faaleleiga o le fesootaiga lea ua i ai nei a lo tatou Malo.

Ona oo mai lea i le Minisita o le Soifua Maloloina, faafetai lava mo le auaunaga, aemaise o le faalavelave lea na tupu mai i le pasi a lo matou itumalo i Savaii. E matauina le agaga faafetai i le tali mai a le aufaigaluega i lea foi tulaga.

Ona oo mai ai lea o se tala i le Minisita o Aoga, o le 90% o tamaiti lea sa aafia o tamaiti mai lou itumalo ma le itumalo o Falealupo. Ona e aooga uma i o i le Itu Asau, lea e i ai le pasi lea na tupu ai le faalavelave. O lea ou te iloa o le tatou faamuamua lava, a tatou taaloga.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Ae na ona toe faamanatu atu pea i lau Afioga ma le Afioga i le Palemia ma le Minisita o Tupe, ia le talosaga a si nei itumalo mo lo matou faleaoga faaleitumalo, ina ia tuuititia ai le feoai o le fanau i o, i le mea o lo o i ai le Itu Asau.

Le Minisita mo Tagata Tafafao Maimoa Mai Fafo, faafetai i le tofa ua i ai se fesoasoani le sa maua mo e o lo o i ai a latou pisinisi faatalimalo. Pau a lea o le talosaga lea e tuu atu, o le galuega lea a le Ofisa o Fuainumera e ese le taua o la latou galuega. O le manaia foi o le suiga, o lipoti eseese ia ua aumai e fai i ai faaiuga a lo tatou Malo, ona o latou e faamoemoe i ai, ia le tele o le aoina mai o fuainumera lea. E pau la se talosaga o le mea lea o tatou turisi, pe a vaai atu i lipoti a le Ofisa o Tagata Tafafao Maimoa mai Fafo i le tele o le arrivals lea e o mai, ae o lea e tupu mai faafitauli i isi hotels ia ona o le latou occupancy rate, ona i ai lea o se lagona pe le se i tagatagai ane, i le tatou arrival card foi lea e taunu mai i o i Faleolo, ia pasese ia aua na e tasi lava ia le faaupuga lena e i ai o le tourism pe le ono faalua tourism foi lea real tourist ou te leiloa po o le a le faaupuga sao e alu ai, ia ma le tatou vaega foi lea e o mai e asiiasi mai i o tatou aiga ma o mai i faalavelave ma o mai i mea faalelotu. Aua e sao lava e fesoasoani uma lava i le tamaoaiga, ia ae tele lava e o mai e le nonofo i ni hotels e na o sina vaega laiti. E omai e tele lava ina nonofo i aiga, ia na o nai manatu e avatu e faatupu manatu i a outou afioga.

Ia le Minisita mo Galuega, faafetai tele lava i lau Afioga ma le Ofisa Sili o le tatou Matagaluega o le Land Transport Authority, faafetai i galuega mo le auala o si o matou nuu i Neiafu. O le mea moni lava, ua pei lava le nuu lea o le isi tamai town lea ua i Savaii, ina ua faaleleia atoa le auala, ae ou te talitonu e atili faamautu ai lau tala lea, pe a fai ma le uafu i Asau. Faafetai i lau Afioga faapea le Pulega o Felauaiga i le lauelele mo galuega faatin.

O le isi faafetai mulimuli, ina ua sii ia le tupe faaalu mo auala o Savaii. Ua ou vaai atu ua e faatele lava matou i le siitaga i lenei Tala o le Tupe lea e \$3 miliona ua sii ai le vaegatupe mo matou i Savaii. Ia ae na o le \$1.2 ia lea e sii ai Upolu nei, ia ae ou matau atu, o talosaga uma lava a lauga a sui usufono, e mo le faaleleia o auala, ae na o le \$37 miliona ia le vaegatupe, ia ae tuu atu ia, i lau faasoasoa e le faigofie ia manaoga o sui usufono mamalu, ia aemaise talosaga a itumalo.

Ia ona ou oo mai lea i fesili, a sui usufono mamalu agai i ripoti a le Komiti Tupe, e i ai le fesili mai le sui usufono o Siumu, i le \$30,000 pe aisea ua leai ai se vaegatupe mo le Samoa Aid Foundation. Ia sa i ai lava le maliliega a le Matagaluega ia, e faasee ese le vaegatupe lea e faalauiloa ai ia mea foi ia a le Aid, ae faasee atu i le isi vaegatupe na e i lalo ifo, e tele lo latou fia faaaogaina i lenei tausaga faaletupe, na e i ai le isi line item na e tau o le faaputugatupe mo le Caution. Ia o le maliega lava a le Matagaluega ua ala ai ona leai se vaegatupe.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Ia ma le fesili mulimuli, pe i ai se alagatupe mo le suiga o le tau, mo faletalimalo lea e afaina i le suiga o le tau. Ia o le tali puupuu ia e leai se vaegatupe o i ai le Tala Faatatau o le Tupe, ia ae talitonu o la ua uma ona i ai ia le Climate Change Strategy for Tourism e i ai foi ia le Komiti, e fitoitonu lava i ai ia le mataupu lea ma o latou foi e faatinoina talosaga mo ni tupe e faatupe ai tulaga ia i le aafia o faletalimalo.

Ia ona faaiu atu lea o se matou faamatalaga aua ua uma le lauga lau Afioga i le Fofoga Fetalai, ia maua pea le tofa i lau Afioga i le Fofoga Fetalai, maua le malosi aua le faatautaiga o le Maota o Samoa. Ia lau Afioga i le Palemia ma le Kapaneta, ia saga utupupupuina pea e le Atua fulu o le segaula, i lo outou malosi, ia ma le tofi mai le Atua e fesoasoani i o outou tiute, e le faigofie. Agalelei foi le Atua i finagalo o Minisita Lagolago, ia aua lo outou tiute o le lagolagosua, manuia foi lenei itu o le Maota, e ua lafo mai i ai le faatuatuaga e agaia le Malo, Taitaifono faapea sui usufono o Komiti Faapalemene, sili le latou tofa ma le soifua faaleagaga, ia e tautoaluaina ai faiva ma tiute o le valaauiua. Agalelei foi le Atua i Faauluuluga o Matagaluega ma Faalapotopotoga ua tatou mafuta i lenei taeao, ia le tapuaiga a Samoa, ia amata mai lava i tofiga a le Atua seia oo i fuaga lalovaoa, agalelei le Atua. O a ni mala o fou mai, ia tau ina ta ma faapoi ae folau i le lagima le sa o Samoa.

Lou itumalo Alataua i Sisifo, ia o le a se vaivai, tofa malie ma uta malie, ia faamuli ma le ai le faafetai i le Failautusi ma le Ofisa o lo o tautuaina ia le Palemene. Ia o le matou tala lea ma le faaaloalo, manuia lau Afioga i le Fofoga Fetalai, ia ma sui usufono mamalu uma o lenei Maota, soifua.

**FOFOGA FETALAI:** Malo, faafetai, malo le tofa, faafetai mo le saunoaga, manino foi le tulaga o le galuega sa feagai ma lau Afioga ma le Komiti mamalu, le Komiti o Tupe Maua ma Tupe Totogi o le Malo, ia ae o lea foi ua aumai lo outou sao, ma tuuina mai i luma o le Palemene, malo faafetai, malo galulue. Ia o lea foi ua faailo manaoga o le itumalo o lo o faamuli tapuai mai, ia malo faafetai e pei o le upu e fai i Atua. Ia maua pea le tofa aua le feagai ai ma tiute ma faiva ia aua le valaauiua.

Ia ma ou te tapa ma le faaaloalo le Malo, ia see atu le galuega aua se tali a le Malo e tusa ai o mea sa laga e sui usufono mamalu aemaise foi le tala o le tupe i le tamaoaiga o le atunuu. Ma le faaaloalo lau Afioga i le Palemia.

**Susuga Hon TUILAEPA AUELUA FATIALOFA LUPESOLIAI LOLOFITELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, faapea foi le paia o le tatou Maota nei, tainane le faafogafoga mai a Samoa, i ona tulaga faalupelupeina. Ua ou tulai atu ma le ava tele, e momoli atu le faafetai i sui usufono mamalu uma o le Maota nei, i a outou saunoaga.

20 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faiatuga faalua**

Ae o le mea moni lava o le a foi la outou faafogafoga mai, pei ua foliga ua matou taliaaina ni isi mataupu ua laga mai, ae e tumau pea le agaga o Fonotaga faapenei faatatau i le Tala o le Tupe, leaga o le Tala o le Tupe lenei o le a faafoe ai galuega a le Malo, mo le tausaga atoa. E faatoa amata ia Iulai, e agai atu i le masina o Iuni i le tausaga fou.

E leai lava se eseesege o le faasoa lea e fai i totolu o le Maota nei ma le faasoaina foi o se manufata tele i totolu o se nuu. Ou te matauina pea pe a oo ina faasoa se manufata, e faasoa i lumafale, ae e i ai lava le matai na te faia le galuega lea, ae siosio e taulelea o aiga uma. Ia se i tulou lava, na ona pena lava o le alaga... e ato, e togi atu lava pue mai. E faasoa atu ia le maio, ae la e tu mai ia le taulealea, o le tele o taimi a tuai lava ona sapo mai e le taulealea e patatu i le fatafata. E i ai ma le upu a Samoa e masani ai, ‘a oo loa ina faasoa taumafa keke maka’. O upu na e masani ai tatou mai tua e le masani ai i latou i le taulaga, aua pe palasi atu lava i le palapala na ona ave lava fufulu ese i le sami toe ave toe saka ave aai ai le aiga. O mea ia e masani ai matou mai tua. A o mai la i inei, e masani lelei i upu faasoa. O lea foi la e fanau mai ai le muagagana i totolu o le Palemene pe a oo ina talanoa le Tala o le Tupe.

Ua ou tau le faalogo i ai, a o le taimi na ou sau ai, tumutumu le Maota nei i toeaiina o le atunu, o upu ia, a oo loa ina talanoa le Tala o le Tupe, o le a faasoa le meafono a Samoa, e le toe milia faauu upu, matua leai lava ma se toe milia faauu upu. E oo lava i le Fofoga Fetalai, lea ou te manatua le faatonuga a le Fofoga Fetalai, na fai i le isi aso ina ua le nofo i lalo le sui usufono, ia valaau loa le Fofoga Fetalai i le Satini o le Maota, ‘ave le sui usufono lea i fafo’, ae fai mai le sui usufono, ‘o le a ou alu i fafo lou mea aigagaoi’. Ua outou faalogo la i upu na fai i na aso, sa fai i aso na, ae saofai atu le Tootooalii, saofai mai le Tama Aiga i ina, i le itu lena.

Lau Afiofa i le Fofoga Fetalai, e le tatau ona tuu lena mea, aua o le taimi lea e faasoa ai meafono a le nuu e matua pisapisao, e matua ala mata ne i te i ua le ai se aiga. E valaau atu lava le isi toeaina, vaai le isi toeaina lea ua galo. E i ai foi la le faasoa mea leaga, e i ai foi le faasoa mea lelei. Ma o le matai lava e faasoa mea lelei, e iu lava ina le ai, ae ave lava ia soo le nuu.

Lau Afiofa i le Fofoga Fetalai, ua ala la ona ou talanoa atu i upu ia, ona e tatau ona soli soli muliaao tulaga o upufai o le Malo. Sa ou nofo ma ou mafaufau, faalogologo lelei i taualumaga o le Maota lenei, talanoa i tupe pau, talanoa i le le paleni o tupe, ae lelei ona ou faamanino atu, o le faaaupuga lea o lo o faaupu ai le tatou tusi mafia lea o lo o outou tilotilo i ai, ma vavao ai lauga i lenei lua aso, Tala Faatatau Autu o Tupe Maua, Tupe Totogi o le Malo o Samoa, mo le Tausaga Faaletupe 2019/2020. Faapalagi, Main Estimates of Receipts and Payments of the Government of Samoa for the Financial Year 2019/2020. O lea tatou te talanoa i miti, lea tatou te talanoa i estimates, o lea tatou te talanoa i guesstimates o lona uiga e tuufaatas i le guess ma le estimates. O lea tatou te talanoa i miti, ae o le faalogo lea ou te faalogo atu ai i isi, o lea ua pau le a, pau le a.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O lea e le i amata le Tala o le Tupe, o lea tatou te talanoa i miti, tatou te le o talanoa i tupe maua moi, aua e faatoa amata ona amata aoao mai, ma faitau loa o tupe maua moi i le Aso 1 o Iulai, lea tatou te le i oo i ai. Ae ua matua afuafu tetele ma sesela isi, i le taeao lenei ma tuuai le a ma le a ma le a, e le i... so o se atinae tele o le lalolagi lenei, e amata i le miti, o mea tetele a le lalolagi lenei e amata i le miti. A le fai miti le Malo, e leai ni atinae e faia, leai ni mea lelei e faia.

Lau Afioga i le Fofoga Fetalai, o lea la tatou te talanoa i mea e le i tutupu, tatou te fuafua ai, agai i le lumana, a o fuafuaga nei, e le o ni fuafuaga faivavale, e faavae lelei i le tilotilo, tupe sa maua i le tausaga le la, ona faataoto lea o le assumptions, e ono toe maua foi tupe ia pe a faapea e fai mea ia. E tele a faiga faavae aua o mea ia e masani ai latou e tapenaina Tala o le Tupe, latou te tilotilo i fuafuaga, aemaise fuafuaga ia ua faataoto mai e le Minisita o mea tau Tupe Maua. E i ai le agaga, a faatino fuafuaga ia o le a faaopoopo seleni mo le lumana. O lona uiga e le o faavaea i ni mea faaletonu le Tala o le Tupe lenei, e i ai faavae lelei ma faavae mautu lea e faavae ai fuafuaga ia, ma ia o tatou manatua na o le Atua e na te silafia mea e tutupu taeao, e tatou te le iloa. O lona uiga e ono tele, ono laititi le keke lea tatou te talanoaina. O lona uiga o le mea muamua lena ia tatou manatua o lea tatou te talanoa le miti tatou te le i oo i mea e tutupu moi. O a la mea e tutupu moi? A lea na saunoa i ai le Taitaifono o le Komiti o Tupe, e uma ane le faatinoga i le tausaga lea na tea nei ua i ai le faasiliga, e uma ane le faatinoga i le tausaga ua tuanai atu ua i ai le faasiliga. O mea moni la mea na, ae soia tatou te soona popole vale i le tulaga o le faapea ane ua pau, pau, pau, o le aitalafu ma le a ma le a ma le a. O lea e i ai le Kabeneta o le latou galuega lena, o lea e i ai le Vaega Faaupufai latou te aumai le tuualalo, a o lea e i ai le aufaigaluega a le Malo, o latou o tamalii o le atunu na aoaoina lelei, foi mai ma faailoga ma tikeri o lea e access i ai le Kabeneta. A o le i faia se faaiuga, e tapa e le Kabeneta fautuaga mai ia i latou o le aufai tikeri ua i ai le poto masani, lea la e lototetetele ai matou, aua o lauia tagata ia e fautuaina le Malo.

O le tausaga e 1983 i le faaiuga, sa matua luga lalo ai le Palemene lenei. Aisea? Leaga foi o le uluai tausaga lea e moni na tulai mai i le 1982 i le faaiuga, a o le 1983 o le uluai tausaga lea ua gaoioi ai le HRPP e faataoto ni faiga faavae ua oti faasoloatoa, bankrupt le atunu lenei. Ina ua ou matau i le vevesi na i ai, na faalupe ai le tama o le Malo lenei le Afioga ia Tofilau o le taitai ua ia faaee le tootoo uamea i ua o tagata o le atunu, ma isi mau faalupega e faamuamu i ai i le taitaiga a le Tootooalii, o le toa o Samoa, o le tamalii e le i oo i ni aoaoga ua oo i ai tatou, ae tele ma loloto le tofa ma le faautautaga tatau, commonsense i le faatinoga o fuafuaga mamao a le tatou Malo. O le tulaga na i ai le faataoto mai o fuafuaga a le Malo, e matua maoae. Aisea? Leaga foi matou te omai ua leai se tupe, leai ni paleni, e lua teugatupe e tatau ona vaai lelei i ai le Malo, teugatupe o tatou lava tupe e faatino ai a tatou galuega ma teugatupe a isi atunu e faaagaaga mo fefaatauaiga, taufai leai uma ni mea se lua, faaletonu.

20 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O lena na outou faafofoga i ai, o lea tatou te talanoa i le 40 tausaga talu ai i le faaletonu na i ai le atunu. Aisea? Aua foi e fiu lava matou sa galulue i le Malo e aumai fautuaga i totonu e le faia, o fautuaga e ola ai le Malo.

Lau Afioga i le Fofoga Fetalai, e le i faigofie le galuega sa faafeagai ma le HRPP, e le gata ina liliu loa le Malo e toe faaleleia ana tupe, lona uiga e tuu i luga tiute, tuu i luga lafoga i le mea e tatau ona i ai. E le gata i lena, ae amata loa ona vaai ma le faaeteete i le faasoasoaina o tupe nei faaagaaga mo fefaatauaiga lea sa saunoa i ai le isi sui usufono. O le mea sa fai i lena taimi i le faaletonu tele, a oo i le faaiuga o Tesema agai ia Ianuari, ona ma faasoaina lea ma le sa avea ma Ofisa Sili o le Tupe o le Susuga ia Alex Dahutson, o se alii palagi mai Niu Sila, o se tagata e devoted, galue. E amata ona usu mai le galuega i le 4 i le vaveao ae alu ese ua ta le 12 i le po, ae ou te manatuaina pea le galuega a le palagi lea, o le matua faamaoni. Ia, taumafai e faasoasoa nei mea faaletonu ua tulai mai i le atunu. A oo la i le faaiuga o Tesema i le tausaga lea e tasi ma le amataga o Ianuari, ona ma talanoa lea ma faasoasoa nei seleni utiuti, tau faasoasoa i pisinisi ma valaau, omai, ia na o le pau lea o le mea a oe e maua, pau lea o le tupe a oe e avatu e oka ai a outou oloa. E faaletonu tele le tulaga na sau ai le tatou tamaoaiga i le taimi na tulai mai ai le HRPP, ma o le isi lea taumafaiga maoae na fai e le HRPP, faatu loa aloaia se faletupe tutotonu lea na pasia i le 1984, faatu aloaia ina ia profesionally vaai, aumai le aufaigaluega latou te vaaia loa mea ia ma tulituliloa aua o tupe ia e sau mai kamupani, i latou o lo o omai totonu o le atunu. O lea foi e iloa e le Malo e le o faamaoni foi pisinisi latou i le aumaiga o tupe. I le taimi lena, e mafai lava ona e alu fai au faatau i tala Amerika ma tala Niu Sila. O le mea la e tatau ona fai, ban loa le toe faaaogaina o mea ia, ia sau uma tupe nei i totonu o le Malo, ma faasoasoa atu ai e le reserve po o le Central Bank of Samoa. Na ou matauina ai le tulaga taua tele o le sau pea o le fautuaga i Minisita.

Ona ave lea o lau fautuaga i le Kabeneta i le 1984, o taimi uma e fono ai le Palemene lenei, ia faatonuina uma lava CEOs e omai, lea lava la e faaauau, omai e faalogologo i le mea o lo o agai i ai finagalo o taitai o Samoa, e leai se isi o toe aisili, o taitai nei o Samoa ua fono, ina ia faamaumau e latou, faamaumau ma amata faataatitia ai atinae e galue ai latou ma aumai loa i le Malo. O aso na e le omai, amata mai i le 1984 seia tau mai lava i le taimi lenei, ia saofafai mai i i le taimi e fono ai taitai o Samoa, faafogafoga mai i le liliuina o la outou tofa i auala eseese ina ia ola ai le atunu lenei ma fai atinae mai tua, ma ia o loa latou e aumai fautuaga, e le toe tau faamatala atu e matou o la e ua faalogologo i mea e lauga mai ai lea sui ma lea sui. Pe afai la e galu ia matou, a o la e ua faamaumau e latou mataupu uma o a outou saunoaga, aua le faatinoina faaauau o galuega mo le atinae o Samoa. Matou te le faia nei mea ina ia tautaua ai matou, matou te le faia nei mea ina ia iloa ai e ala ona fai mea ia e faatino le mea na ala ai ona tofia i tatou tatou te omai i i e fai le galuega mo tatou nuu o lo o faatalitali mai.

20 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faiatuga faalua**

O le ala foi lena e le tuuina ai lou tautala soo a i lea mea ia i tatou nei e omai i totonu o le Palemene e fai a tatou pisinisi. Ia faataatiae na mea, ae ia manatua foi o pisinisi e ola ai aiga, ia tuu i a outou fanau e faauau ae aua tou te toe aafia ai pe afai ua tofia oe o le Minisita po o le Taitaifono o le Komiti.

O lona uiga, aumai lou taimi atoa e te tautua ai i le atunu lenei na tofia i tatou. A o upu lava a lo tatou Alii, e le mafai le mafai ona e auauna i ni Atua se lua, aua o le mea e iu i ai, o lou saofai i totonu o le Kapeneta, a o la e alu lou mafaufau i au pisinisi. E tatau lava ona e faamavae ae e alu e fai au pisinisi. E le aoga ona e saofai, ae le o i ai atoa le tulaga o le atoatoa. Tuu i fanau, tuu i le toalua e o e fai, a o lou taimi atoa, ia e saofai i le mea na e tauto ai. Lau Afioga i le Fofoga Fetalai, o le tulaga foi lena pe a fono le vaega lenei, ou te faamanatu pea a tatou tautoga sa fai.

O le tulaga la i le Tala o le Tupe, o lea ua taoto mai nei, e le i amata na o fuainumera ma matematega. Aua e tatau ona ou faapea atu, o le faaaogaina o le upu lea faatatau, na o ni fuainumera ua faatatau estimates, ae lafo i le Atua, aua o tatou na ona fuafua a o le Atua na te faatino. O le a la le mea lea e taoto mai i fuafuaga ia mo le lumanai? A lea e manino mai i le Tala o le Tupe na saunoa i ai le Afioga i le Minisita o Tupe saunoa foi i ai le Taitaifono? O le tatou Tala o le Tupe e \$913miliona e ova i le \$900miliona toeitiiti lava piliona le tatou Tala o le Tupe lea o lo o i ai nei fuafua mo le tausaga fou. I le \$913miliona lena, e agai tonu lava i tupe ia e aumai i inei lea e pasia atu e le Palemene, ae le aofia ai galuega o lo o fai e Faalapotopotoga Tumaoti a le tatou Malo e tai pei o le kamupani vaa, tai pei o le NPF ma isi faalapotopotoga. Ae a aumai loa tupe na e tuu i totonu i i pe a faaopoopo faatasi, e ova i le piliona lea e faagaoioi i totonu o le tatou tamaoaiga, ae leaga e le aumai i i o la e fai lava latou galuega. Na o le pau a tupe e aumai i totonu i i, o tupe e faagaoioi e faalapotopotoga tumaoti a le tatou Malo lea e faatu i luga o Tulafono faapitoa e mafua ai ona aumai lipoti i totonu i inei i le Palemene, ma i latou foi o lea e fesoasoani i ai le Malo, o tupe ia e avatu i i e ave i lea faalapotopotoga ma lea faalapotopotoga, e taumafai e ola ai ma faagaoioi, e tai pei o le iunivesite lea e faalagolago mai i le Malo ina ia faagaoioi pea le iunivesite.

Lau Afioga i le Fofoga Fetalai, o aso ia sa tatou faatoa tutoatasi ai ma ou galue i le Matagaluega o Tupe, na o le lua lava vaevaega o le Tala o Tupe i le taimi lena, na o tupe sa faalupe i le Gagana Peretania, capital expenditure, ma le vaega lua, sa faalupe o mea o maintainance expenditure ona sau ai lea. O le faalavelave lau Afioga i le Fofoga Fetalai, ua tupu le Malo, o le taimi na tatou tutoatasi ai e le i taitai oo i se miliona tala le tatou Tala o le Tupe aua e le tele ni alagatupe na maua i lena taimi e oo foi i toeaiina sa faafoea le Malo, sa fai lava ma le faaeteete, e tau aoao ma tau suesue le tulaga o le faagaoioiga o mea nei o Malo Tutoatasi e fou i le latou faatofalaiga, fai ma le faaeteete. E le tele foi la ni atinae sa fai aua e le tele foi ni alagatupe leai foi ni nogatupe na fai, e laitiiti lava sa faalagolago lava i totonu o le atunu lenei.

20 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

A ua oo mai la i le 1970, ua tupu le atunu, ma o mea ia e fai e Malo, e matau le tupu lea e tupu ai le atunu, o le ala foi lena e fai ma fai ai tatou tusigaigoa aua o le tuputupuae o le aofai, o le tuputupu foi lena o galuega e tatau ona fai e le Malo.

Ma o le Malo e vaaimamao, aua ne i muta le vaai i le isi faiga palota, ia faataoto fuafuaga e fua mai i augatupulaga i le lumanai, aua ne i faia ni atinae o ni mea e fua mai i le taimi lea e fai ai le faiga palota. O le ala lena e fai ai le tonu a matou le Vaega Faaupufai i lena taimi, e le lava le tolu tausaga, o le tolu tausaga e agai ai manatu e fai mea o tamai mea ae tuu mea tetele, mea tetele na e fanau mai ai galuega fou mo fanau a Samoa o le lumanai. O ai lava la se Malo e sau i i e faafoe le Malo lenei, ia tautuana ma latou, e le o le faaiuga o le lima tausaga e taua, e fua faatatau i ai atinae, a ia fua mo le luasefulu, tolusefulu, fasefulu, limasefulu, selau tausaga i le lumanai. O le mea lena o lea e faavae ai le galuega tele i Salelologa. O le mea lena o lea e faavae ai le galuega tele o lo o fuafua nei mo Vaiusu, o le vaai pumoomoo i mea o atinae na o le lua tausaga, tolu tausaga, e leai se mea e ese ai ma le tagata e tu i auvae mauga. O le a le mea e vaai i ai? Na o tafue o laau. A fia mamao lau vaai, alu e tu i le tumutumu mauga ona mamao lea o lau vaai i mea e tatau ona fai mo le atunu lenei o Samoa, e le faia ona o le fia iloa o se isi, ae fai ona o le vaaimamao i le lumanai. Lele ua faafeagai tatou ma le anoano o faafitauli lea ua tulai mai i le suiga o le tau, e tulai mai ona aso a ia faataoto atu e tatou atinae e manuia ai Samoa, manuia ai fanau a Samoa o le lumanai.

Lau Afioga i le Fofoga Fetalai, o le aofai la lena o le tupe lea tatou te lufilufia nei, e i ai le \$113 miliona tala e fuafua mo le tausaga o lumanai nei. Pe alu alu alu ona tutupu mai foi lea o ni afa pe a, ona toe fetuunai foi lea o le tofa i le Malo ma toe tilotilo i le toe fetuunaiga pe toe faaopoopo tupe, ina ia oo atu i le piliona, aua o le uiga na o mea o Malo magafagafa, e vaavaai e le gata i le sologa lelei o aso ae fuafua foi mo aso ma taimi o puapuaga. O lea la ua faataoto ai le Tala o le Tupe lenei ma o lena ua uma ona sausaunoa sui usufono i le \$913 miliona lena ua fuafua, ae na o pau lava lea o le tatou tupe maua e \$826 miliona. O le a la le tulaga e faatupe ai le eseesege lea? E faatupe i a tatou aisiga, faatupe i nogatupe e mama le tului lea e avatu i totonu i i, soft term financing, e \$26 miliona, faatupe i a tatou atinae e nono faapitoa mai ai tupe mo le faatinoga. Ia manatua foi la, o le tele o atinae lea e faaauau, lona uiga e le o ni nogatupe fou, a o vaega e tatau ona faaaoga mo lenei tausaga agai atu i le tausaga fou.

Ona taoto mai ai loa lea ma le faaupuga lea e i ai o le tupe pau e \$87 miliona lea e faatupe mai auala eseese ia, a o le vaega e faatupe aloaia mai i mea o nogatupe mama, e \$26 miliona ona totoe ai lea o le \$61 miliona, o lea la e faalupe o movements in cash balances. A o lea la e faa-Samoa mai o tupe faasili po o tupe pau. O lona uiga ua sili atu tupe faaalu na i lo tupe maua. A o le faaupuga sao lava o le \$61 miliona lea, o le paleni lena o tatou tupe maua, tupe maua mai a tatou lava tupe ma nogatupe.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

O le faaupuga sao lava lena i le gagana faa-Samoa, a o lea e faalupe o le movement in cash balances, a o tupe na o lea ua i o tatou lima mai ia tatou partners in development latou ia o lo o fesoasoani mai e auala mai i tupe e aumai e mama le tului.

Lau Afioga i le Fofoga Fetalai, e tatau lava ona oo sau upu i le mea lea o le tupe ua sili ai tupe faaalu nai lo a tatou lava tupe maua e le taulia ai tupe ia mai fafo. O le taua o le mea lena i le tomai lea faa-economist, e le o se mea leaga le faaova o tupe faaalu nai lo tupe maua. Aisea? Aua foi o lea e maua ai galuega. Ina ua tupu le depression i le 1930, o le taimi lea na matua aafia uma ai le lalolagi ua leai ni galuega a tagata, na faaoso ai e Malo mo galuega tetele, ae faatupe i loans, nogatupe. O Niu Sila ia i le anoano o latou tagata le faigaluega, ua faamalosia loa le Malo, aumai tagata e o e tusa pe leai ni tupe ae nono solo mai tatou tupe ave e faafaigaluega tagata, o le tulaga aoga lena o le mea lea o le deficit financing faaoso ai galuega a tagata, o la e o le a feoti i le fia aai. O le Malo la e i ai le tiute lena, lea la na o ai toto faasoloatoa le paina i Niu Sila, o le a la le mea lea ua tupu i le aso ma le taimi lenei? La le ua aeae Niu Sila i le fia piliona ma piliona ma piliona e maua mai le laupapa, na faaoso i le vaaiga a tagata maumau le taimi o le a le mea ua soona toto ai le laueelele i nei mau laau? A o lea la ua fua mai. O le mea la lea, soia ia tatou te pisa i lea mea o le ova atu o tupe faaalu i lo tupe maua.

Sa ou i Savaii i le lua tausaga talu ai pe a, na ou alu ai e tatala le malae o le itumalo lea o Safune ma Mauga ma Paia, o le toeaina na lauga mai ia te au, o lea toeaina ou te vaai atu masalo po ua ivasefulu tausaga le matua. Fai mai le lauga a le toeaina ia te au, faafetai i lenei malae ma lenei fale ua fausia, a o le mea lea lau Afioga i le Palemia, ma te faalogologo atu lava i a outou fonotaga ma le vaega lea fai mai e aua le o soo i fafo e nono mai ni tupe. Se faamolemole aua e te amanaia le pola motu i tua, aemaise lava le Savaii e toatasi lena na te faia pea lena mea. Se faamolemole e matua loan mai tupe e aumai e matua atiae ai Savaii. Ona ou nofo lava lea ma ou mafaufau, ia se i vaai i lenei toeaina e le i oo i ni Iunivesite a o lea e talanoa sao mai lava i mea e masani ona talanoa ai mea o professor of development economics. Mo polofesa la e aoao i iunivesite, a o lea e sau i le toeaina e le i alu i se aoga maualuga faapea. O le tofa teumau lea e i taitai o le atunu lenei, aua ne i faatamala i ai tatou, aua tatou te faatamala i ai i le tatou o i ai ma ituaiga nanunananu foi nei pei o le alu o le laausuisui, ona e alu atu loa lea e saofai i totonu, e tasi lava lau upu e fai ae tilotilo mai le toeaina faapea, ua le iloa le mea a le tatou atalaii na alu i fafo e fai, matua faavalevaleda tele ma ana upu ia e fai mai. E matua mamao le tofa teumau lea e i totonu o le tatou atunu. O le mea lena e taua ai tele ia tatou le fai ma o tatou faalogologo i upu a le aumatutua, leaga fai mai le upu a toeaiina, o le tele o aso o le tagata i le lalolagi lenei, o le tele foi lena o lona iloa.

Lau Afioga i le Fofoga Fetalai, talu mai ona tatou amatamata mai le faigamalo lenei, o le fua taualuga lea sa mulimulitui i ai fautuaga e aumai e le aufaigaluega e ave i le Malo. Ia tatou faaeteete i le soona o e nono mai tupe, e tatou te fai vaavaai ma fuafua lelei i le gafatia ona totogi o nogatupe na.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faiatuga faalua**

I fonotaga ia matou te o ai, mai lava i le taimi faatoa amata ai ona ou galue i le 1970, o fonotaga nei faava o Malo sa faia i Uosigitone, Filipaina, Asian Development Bank faapea foi ma fonotaga e fai i le European Investment Bank a le ACB, se e taumulimuli solo faletupe nei e tauanau le toatele o taitai o atunu, se omai e avatu tupe o lea e lava. A o le faalavelave la, e te faavalevalea ai loa, oti loa ma lou economy, leaga e maualuluga tele tului a tama ia. Lea la ua afaina ai foi ma tina ia e i tua, ona o le isi kamupani lea e i ai nei, e fiafia e tatala atu a latou seleni i le vaivaga lea e i ai le toatele o tatou, i le mea o le ola i aitalafu ae oo loa la i le taimi e tapa ai ua leai se mea e tago i ai. O le mea lea e taua tele ai le faatupu manatu o se mea e tatau ona tatau ona tilotilo i ai le Minisita o Tupe aemaise foi o le Kovana o le tatou faletupe tutotonu o lana matafaioi lea, o le silasila totoa ia i latou e soona fai ma le le alofa a latou nogatupe i lo tatou atunu.

O le tausaga e 1991, na sau ai le savali a sui o le Development Bank a Italia, o le taimi lena o lea faatoa tofia au e avea ma Minisita o Tagata Tafafao Maimoa Mai Fafo, o le matua ou naunau e matua fai ni a tatou faletalimalo, faaleleia le tatou vaalele. Omai loa le toalua lea nonofo i ou luma, ‘ua ma omai e tele le tupe i Italia, e fia aumai e atiae ai le Malo o Samoa. Ua ma tilotilo e tele mea ia e tatau ona aumai ai le fesoasoani lea a Italia i le Development Bank lea a Italia, o lea la ua ma omai nei, o le tou atunu ua matua moomia fesoasoani faapea.’ Ona ou ata a lea ou fai atu, ‘E fia la la outou tului? ae fai mai le aualaii, e na o se 8%.’ Ou fai atu a le i lalo ifo o le 1%, Im sorry. Fai mai, o ai le faletupe faavalevalea na te aumaia na mea? O le faletupe o le ADB o le faletupe o le World Bank, afai la lua te le mafaia, e sili loa la le lua o ese ma lou Ofisa matou te le manaomia. O loa, pe valu tausaga, ae ou fai atu, ua fai le palota a Cook Islands ma aveese ai le taitai o lo latou Malo, ua o atu le toalua lea, fall ai loa i ina le Palemia o Atu Kuki. Ua fau ai loa le Sheraton, ua fau fau le Sheraton ua le uma, ua oo nei ina totogi, o la e pala ai lava le Sheraton i ina i Cook Islands, ae mafua i le toalua lea na o mai i inei i Samoa.

Lau Afioga i le Fofoga Fetalai, e tele mea faapea e tutupu, ao lea e puipui lava e le Malo, e sosolo lava i tatou i luga o le Faiga Faavae. Tatou te le soona o solo i faletupe nei, e tatou te vaai totoa lava i le tului ma mea ia tatou te maua mai. O le ala foi lena e le tuuina lava fautuaga a faletupe tetele nei o le latou general o le fautua lena e ave lava i atunu uma, e aafia ai ma Samoa. Ae le mafai foi ona aveesea ia le tomai o tatou tama fanau sa galulue ai i totonu o le World Bank. O isi sa galulue i le IMF, o isi sa galulue i le ADB, ao le mafuaaga lea na faamatuu atu ai e le Malo, e o e sikaki mea na, ma tou spy solo ai i auala e taumafai, ona outou toe foi mai lea e faaaoga i lo tatou Malo.

Lau Afioga i le Fofoga Fetalai, o le auala lena o lea e alu ai lo tatou Malo. E matua vaai lelei i le maualuga e oo i ai a tatou aitalafu, toe vaai lelei i le tulaga o atinae o lo o fai. E fai atu le tatou fale tele lea na tatou faaaogaina ai le nonogatupe lea mai Saina, ae tipi motu e le World Bank ia grants e aumai ia Samoa. Fai mai sa le tatau ona faia. Tipi motu foi e Niu Sila ma Ausetalia la latou fesoasoani. Tipi motu foi e le ADB.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Ona ou talanoa lea i le isi sui o le World Bank, ae fai mai, o le faalavelave o le grant element o lea e avatu e le faletupe lea, e 36% le vaega e avatu faafesoasoani. Ao le vaega lea e aumai e Saina, e na o le 27 % le vaega e aumai faafesoasoani o le grant element. Ona ou fai atu lea, o lea o le a ou alu ou te talanoa i ai. Fai mai, ia ua lelei.

Ona ou talanoa lea i le Peresetene i le fonotaga lea sa fai i Fiti. Na matou o ma faufautua ou fai lea i le Peresetene, alii, se i alofa ia i la matou atinae lea e fia fai. Pe mafai ona tuu ifo i lalo la outou grant element, le vaega lea o fesoasoani, ina ia tutusa ai outou ma faletupe o Asia ma le faletupe o le lalolagi le IDA, o le soft window lena, o le faamalamalama lena e sau ai fesoasoani, e maualalo le tului. O lena ua uma ona fai lau galuega ae tipi lava, ona gaoioi loa lea o le Central Bank. E valu masina ae ave i ai ma le Matagaluega o Tupe, ae ave loa i ai le study, e ta'u i ai cost benefits, o le tau lea a o le manuia lea o Samoa e maua mai ai. Manatua la a talanoa i manuia you talk about economic benefits and spin offs. O mea ia lautele e manuia ai le atunu.

Na ona tilotilo lava i ai o le World Bank fai mai, se faamolemole faamagalo mai lo matou sese. O mea uma ia sa matou taofia o lea o le a toe tatala ma faamatuu atu. Ona toe tatala mai lea o Niu Sila tatala mai Ausetalia. Lau Afioga i le Fofoga Fetalai, e le o nofonofo a tatou foi ia tama fanau. E le o ni tama fanau e faavalevalea, o le ala foi lena na tofi ai e le Kapaneta. O tama fanau nei sa aooga lelei i fafo, o lea e fautua mai i lo tatou Malo. Ma o le mea lena o lea e faagasolo ai pea a tatou fuafuaga mamao. E leai foi se faalapotopotoga, e tatala maia se nonogatupe ia Samoa. Manatua o faalapotopotoga tumaoti uma nei tau tupe a le lalolagi, o tagata la e i ai i totonu na o polofesa polofesa polofesa o mea tau tupe, e faapena foi ma le ADB. E le mafai le mafai ona tatala mai e se faalapotopotoga lena ni nogatupe ia Samoa pe a latou iloa, ua faaletonu a tatou totogi aitalafu. O le mea lea e masani ona sese ai le toatele, o la e manatu e totogi uma i le tausaga fou mea nei. E te tilotilo i le umi e totogi ai, ma e tilotilo i le maualalo o tului ia e totogi. O i ina e te faamasino ai ia le tulaga o lo o i ai a tatou aitalafu. Ma o lo o tamau i faamaumauga nei, o na e silafia, le tulaga ina ua uma ona faataatiae tupe e totogi ai a tatou aitalafu. O lea na o le \$70milliona, faataatiae tupe e faagaoioi ai le Malo ae ova ai lava pe tusa ma le \$80milliona e lagolago i le atinae. O le mea lena o lea e taumafai i ai le Malo. E soo se Malo e taumafai lava ina ia taofiofi le soona faaalu tupe ae ia lava ni tupe fai ai atinae. Aua a leai se atinae, e leai se agai i luma o le Malo. O le atinae o i e mafai ai ona fai galuega tetele.

O lea sa ou avatua sina faataitaiga, o le taimi talu ai na tatou tauto ai, e tau i le isi taimi e fai ai a tatou faiga palota ua fananau le tai fia afe o le tai lima tausaga. Fananau le tai fia afe o le tai fa tausaga, tolu tausaga, lua tausaga tasi le tausaga ma pepe. Ao la ua iu aoga a le tai sefuluiva, luasefulu, luasefulu tasi, luasefulu lua, luasefulu tolu, luasefulu fa. Ua tatau ona sue ni galuega, o le mea la lena e le mafai ona nofonofo ai le Malo lenei aua e le uma le fai pepe. E tutusa ai lava ma outou o lena foi e fai a outou pepe.

20 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Tou te malamalamala lelei ai la i le mea lea ou te tautala atu ai. Afai o lena foi e fai a outou pepe ona outou iloa lelei lea, e le sese upu ia ou te talanoa ai. Ae se i vagana la le Vaega Faaupufai e vaai mamao i luma ma faataoto mea o atinae tetele nei, o atinae nei e se a se a ona faia e se Malo e na o le tolu tausaga le umi. E le faia e se Malo e na o le pau lava le mamao o le vaai, o le sau mai le mata e tau i le muaisu. Ia mamao le vaai aua tupulaga fai mai o le atunuu lenei.

O lea la ua taoto le Tala o le Tupe, ou te faamalo i le tofa tatala i le taliaina o le tatou Tala o le Tupe. E i ai le itu taua lea ou te fia oo i ai. O le tulaga lea i le faatinoga o a tatou galuega, ma e lelei lava ona ou toe oo i ai. E i ai le isi Ofisa Sili o le Matagaluega i le tausaga e 1995, o le doctor. Na sau ia te au fai mai, se faamolemole o lau pepa lea ou te fia alu i Manila. Ou fai atu e te fia alu e a? Se e i ai le mea fou lea e fai ai le seminar. O le a le mea fou? O le mea fou o le Tulafono e faaigoa ole good governance. O taiala e faatino ai galuega faale-malo ou te fia vaai i ai po o le a tonu ia mea. Ou fai atu, o la lava e i totonu o a tatou Tulafono le mea lena. Fai mai e a? O la e i totonu o tatou Tulafono, ana e vaavaai lelei, o lea lava tatou te alu i le good governance. E te fia alu a la? O lea o le a ou faamatala atu ia oe.

E tolu lava mea tetele na e taui i totonu o le good governance. O le mea muamua, o le transparency ia manino mea uma, aua le i ai ni mea e faaalatua. O le uiga o lena mea, o lea e faavae ai le galuega a le Malo. Tender out mea, a oo i galuega e fia, e faitau miliona ma miliona, ave e faasalalau aua a faasalalau o lona uiga o iina e taugofie, aua o le tagata lava e taugofie e ave i ai, pe afai lea e lelei ana masina, lava le tomai. Ae afai o se tulaga foi lele alualua, e mafai lava ona e faapea ane, ave ia le mea lea i lau uo na te faia, ona sau loa lea o le tau ua tele. O le ala lena ua mulimulitu'i ai le lalolagi atoa i le good governance, transparency.

O le vaega e lua, o le accountability, o lona uiga o mea uma ia faamaumau, ia iloa tonu le tagata e mafua ai ona lelei ona taui lea. Ao tagata na mafua ai ona leaga ave i uta i Tafaigata e loka. O le ala lena e malosi ai tele mea nei o suetusi ma tausitusi. O le ala tonu lena na ala ai ona tofia suetusi a le Malo, ina ia lipoti sao mai i le Palemene aua lava ne i lipoti i le Malo. Lipoti sao mai lava i le Palemene, o pule ia o suetusi independent. O le ala lena, e tapena ai lipoti ma aumai, silafia e le Komiti.

O lea e faafogofoga mai ia Pule Sili o Pulega o Matagaluega, o le tele o Matagaluega ua uma ona tapena a latou lipoti ua up-date a latou lipoti, ao lea foi e tulituliloa e le Kabeneta Matagaluega uma. Ia vave ona ave lipoti i totonu o Komiti, ona avatu lea ma outou silafia, o le matua leai lava o se aoga o se lipoti e avatu ua tolu tausaga le tuai. Tou te le iloa ai le mea na tutupu ma tuai ai la outou fautuaga e toe lele mai i totonu o le Maota lenei. O lea e faafogafoga mai ia Ofisa Sili o Pulega a Matagaluega ma Faalapotopotoga, fai a outou lipoti up to date. O taitai ia o le atunu, a valaau atu foi ia Taitaifono tou te o mai, ia tuu nisi mea tou te faia ae o mai. O mai e tali ia latou fesili, faamalamalama i ai mea o lo o tutupu. O uiga uma na o le accountability ma le transparency. E i ai la ma le mea lona tolu.

20 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)**  
**2018/2019 & Tulafono Tau Faaofi o le Faatatauina o Tupe 2019/2020**  
**– felafolafoaiga i luga o le faitauga faalua**

O lona tolu, o le fai ma soalaupule ma le atunu. O le mafuaaga lena o lea e ala ai ona fai Tulafono ma valaau. E valaau lava e Ministries le atunu e omai e talanoa. O isi taimi ua faatu Komisi Suesue, tai pei foi o le isi Komisi Suesue na faatu i le mea lea o le pule soona fai a faasaosao a aiga. O lea ou te manatua na taitaifono ai Oka Fauolo. Na i ai foi ma le isi Komisi na suesue i le manatu ua tatau ia ona taofi le anoano o nei mau Ekalesia e oso solo mai, aemaise ua fefefe tagata i mea ia e tutupu mai Iran. O le manao lena o le fono a Ekalesia, e taofi. Ona fai foi lea o le iuga a le Kapaneta e fai se Komisi Suesue ae faataitaifono ai foi le Taitaifono o le Fono a Ekalesia o Oka Fauolo. Ou te le iloa pe lua ea tausaga o fai le Komisi lena. Ae sau le lipoti, e faatumau pea le faavae, aua le suia. Se i silasila la, a malamalama lava se mea, e oo lava i fono a Ekalesia, na manao e tapuni nisi Ekalesia. Ae o la ua sau lava i fofoga o le Taitaifono, taofi aua ne i suia se mea e tasi. E oo foi la i le Tulafono lea o le Resitalaina o Fanua. Na ou i ai i le aso na tatala ai le Fonotaga lea. Ou te manatua o le afioga ia Misa, lea sa nafa ma le taeao lea. Sa i ai uma lava le atunu. O upu lava ia, “aua le tago i afi”. Ia ou te manatua lelei lau lauga na fai, o le isi lea taeao fou, tatou o e suesue tonu lava mea ia o le lisiina o fanua po o a faafitauli, a o a auala e mafai ona fesoasoani i atinae o le atunu. Ma ua ou faalogo soo a i le upu lea, tafefe ua outou tago i afi. O lau upu i lena taeao, ua tele afi ou te vaai o pupusa solo, ou alu atu ua ou fia tago i ai, ae ou alu atu na o ausa lava.

O le mea lea lau Afioga i le Fofoga Fetalai, e tele le mea lea e tupu nei lea e tele ai ina faitio tagata o le fefevavale ma le le fia malamalama. O lea foi e taumafai le Malo e faasalalau ma faamalamalama mea nei. O le mea lena ou te toaga ai e fai polokalame, e omai le social media e matua tui au i fesili ma ou taumafai e tali. Tou te silafia lelei ou te le iloa mea e tutupu i aso uma a o lea lava ou te taumafai e tali. O au foi ou te iloa foi le lelava ae fai ona e taua ia te au le atunu ia malamalama, aemaise le toatele o le mau tiapolo ia e feoai e i lalo o le igoa o le SSIG le isi tiapolo, o isi taimi ua i lalo o le OLP. O igoa na o lusifelo lea e fesuisuiai solo, a o le mea lena o lea ou te iloa o le tatalo a le atunu lea e maua ai le malosi ia te au ma le Kapaneta ma le Vaega Faaupufai e talitali malie atu ai le anoano o tuuaiga sese ia e fai mai i le Malo.

Lau Afioga i le Fofoga Fetalai, o tulaga na e taumafai ai le Malo ia piipii i mea ia o good governance, principles, taiala ia o faigamalo lelei. Aisea? Leaga o i lea e faavae ai fesoasoani ia e aumai i Malo mai fafo. E pei lava o le ao i le latou vaai le tulaga lea e i ai Samoa. O le a le alu atu o le Observer na o mea leaga mea leaga lea le tele mea e alu atu i le Observer e ai ai le latou pepa. Ou te le tio foi aua o isi foi faipisinisi, e faapena uiga o pisinisi. Ua faafia ona outou vaai i le TV, manaia le masini tamea lea e leai ma se faaletonu, ia e te alu atu e ave le masini e ki atu e malepe, ona e sau loa lea e faafoi, ae sau le tali sorry, e i ai le tulafono o mea tau fefaatauaiga, e le aumaia lou faavalevalea ma lou le iloa e te lafi ai. O le Tulafono taua lava lena, ignorance is no excuse. O le mea lena o lea e tupu nei i le tele o faasalalauga ia e fai faapisinisi.

20 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

I le tulaga la o le tatou atunuu ma le mea o taumafai i ai le Malo e mulimulitui i Tulafono ia o le amiontonu, e le faapea o sao lava i aso uma, e i ai foi taimi e fiu lava e fai atu ae tutupu lava faalavelave, lima tagoese ane lea, lavea ane le taavale i lea, o lea e i ai auala e fai ai. E oo foi i lea foi e fai suesuega. E i ai lava tagata e le malilie i iuga e fai ma o ma fai faasalalauga, ae le mafai ona see ese le Kapaneta i faiuga e tatau ona fai. O lea foi la ua i ai le isi faaiuga lea na nafa ma le faamasinoga lea ua aumai i totonu o le Maota lenei e fai i ai le faaiuga a le faamasinoga.

O le taua o le faaiuga lena, ona o lea ua matua matilatila ai le malosi lea o lo o i le Fono Aoao Faitulafono. E leai se isi malosi e i luga atu o le Fono Aoao Faitulafono, Supremacy of Parliament. O lea ua oo lava i le faamasinoga, e le mafai ona faia se iuga mautu i o i le faateaina o le Peresetene seilogia e fai i ai lo outou finagalo, o lea la ua aumai i totonu o le Palemene e address e le Palemene le mataupu lenei, masalo o se taimi oi luma ona aumai lea.

Lau Afioga i le Fofoga Fetalai, o le tulaga foi o le faafoeina o le tatou atunuu i ala o le Tulafono, o si vailiu a lea lea e tele ina le o malamalamā i ai tagata. E i ai lau Minisita lelei lava, Mulitalo, e tele ana galuega lelei sa fai. O le toa o le Minisita lena lea ua mafua ai ona faatu le tatou dialysis unit. E tele atunuu o le Pasefika latou te le mafai le mea lea, ae na mafai e Mulitalo, tasi lena toa o le HRPP. Ia, a ua oo nei i le faiga palota, ona molia ai lea, ia te au lava ia e faatauvaa lava, e mafai a ona interpret i le tulaga faaleaganuu lea e le i o atu le toatele o lona itumalo i Savaii, a o lea e salalau solo i inei, ona alu ai lea fai lona oo i Savaii ae toe sau fai le isi ona oo i inei, o le mea la lena na molia ai, molia i le faatosina ona ua lua oo, ona fai ai lea o le finaugia po o se faa-Samoa tonu lea.

O aga la a le Tulafono, e le taofia le Loia Sili mai le aafia i mea faapea, friends of the Court, semeamanu a la e sao Mulitalo i finaugia foi sa fai, aua o mea a nei e fai e nei mea o loia e tiga lava ona iloa e sese ae finau a. E i ai le isi loia na tau mai ia te au i le isi tausaga, ina ua faamavae i Niu Sila, ona fai loa lea o lana aiga, ia, fai loa lea o lana lauga a o le loia o le matua lauia lava o lauia. Fai mai loa lea o le tala a le loia, ia, o le taimi nei foi o lea ua ou faamavae, ou te alu nei ou te tatalo i le Malo, sui le Tulafono lea e faapea e faasa ona talanoa sao se tagata ua molia i leoleo, se tagata ua fai se agasala, se solitulafono. Faatoa mafai lava ona fai seilogia e i ai lana loia ae o lona uiga, e maua ai ma le avanoa o le loia e kami ae ai i tua, tuu i ai upu i le gutu. Ia, ona fai mai loa lea o le loia, tele le mau pagota sa tatau ona ave i le falepuipui ua ou faasaoina i luga o ala o le Tulafono. O lea la o le a ou alu e fai sau tatalo, aveese lena mea, ia saoloto leoleo e o e loka mai tagata ma interview ae aveese lena mea, o le mea lena ua sao ai le tele o tagata solitulafono ona o le atamamai tele o loia e faasao.

Lau Afioga i le Fofoga Fetalai, e le o se tala lelei mo Loia, ae leaga o le profession lena a loia. Ua ala ona faia le tala lea, ua alu alu nei le faamasinoga a o lea ua intervene le Loia Sili, e le i fesili mai foi ia te au, aua o le latou lava lea galuega.

20 IUNI 2019

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faitauga faalua**

Ma i lalo foi o le Tulafono e sa ona faalavelaveina e se isi galuega a le Loia Sili faapea foi ma leoleo. O au la ua te i ina ua ou tilotilo i le pepa, ua matua alu motu Mulitalo i le Loia Sili, o ia semeamanu e malo ae talu ai le aia valea fua o le loia, o le Loia Sili o lea ua pau ai. Ia na sau a lea ia te au lau Minisita ou faamalulu i ai, ou fai atu, o le isi mea ua tatau ai ona e pau, o le tele ia o lau fautuaga na tuu atu ia te oe i le mea e fai, a ua tele lou fiapoto. A o la e fai lava e le Loia Sili ia le mea e puipui ai le mamalu o le Malo.

Ia, e fai lava sina mamafa o upu a Mulitalo i le Loia Sili. O le aso na sosoo ai na oo mai ai le Loia Sili faamavae mai ia te au, o le isi lea Loia Sili sa ou manao e faaauau ae faamavae mai i le tulaga o le faamasinoga tonu, e le tatau ona faaauau a o lea ua upuvaleina lana galuega e le Loia Sili.

E i ai le Paeaiga talu ai na faamavae ai le isi faipule o le vaega lenei, ia, o lea la sa ou taua, na fai ai lea o le faamasinoga sala ai lea o le faipule ma iu lava ina faamavae ma le Palemene ona ua tatau ona faamavae i lalo o le Tulafono. A o le faalavelave la, ua sau nei le Lipoti ua tau manino mai ai lava e le faletua, o ia na faia solitulafono ia e le o lona toalua. Ua ou te i lava la i le tu i lou fale i le vaeluapo ua o atu e talosaga atu sau fesoasoani. O au foi la ua oso lou alofa i ai po o le a le mea o le a toe faasala ai ua uma le sala, o lea ua faamavae le faipule. Ona ou talanoa lea i le Attorney General i le aso na sosoo ai ae faamatatalaga mai e le Attorney General fai mai, ia o le mataupu lea o le mataupu lava faaletulafono e fitoitonu i lau galuega ma lou ofisa i le puipuiga o le Faavae o le Malo o Samoa. E le tau avatua la aua e leai sau feau e aiaina ai fua la matou lava galuega mo le puipuiga o le mamalu o le Malo lenei. Ia tatou manatua foi, o lea e faapenei uma mai mata o Malo uma ia e tatou te faifaimaea po o le a le tulaga o i ai le rule of law i tottonu o le atunu lenei o Samoa. E i ai foi le tatou Palemia i le tausaga e 1982, ia se i vaai o le Palemia, o ia o le Minisita o Leoleo, a o ia foi o le Minisita o le Loia Sili, a o le a le mea na tupu? Na molia lava le Palemia. O lau tala na fai ia Salelologa ina ua omai ia te au e toe fetuunai le tau o le fanua sa matou talanoa ai ou fai atu, ‘Salelologa o le mea lava ua tatou malilie ua uma ona saini o le mea lena, ma o lea o le a ou tau atua ia te oe, e tele Malo e oo lava i latou Ao o Malo ua falepuipui ona o le tulaga lea o le good governance ua latou solia, ma ou te le fia falepuipui ona o Salelologa, ou te le fia talia la outou savali.’

Lau Afioga i le Fofoga Fetalai, o le itu lena ina ia malamalamama lelei ai le Maota lenei i le galuega e fai e le Loia Sili, le galuega e fai e le Suetusi, le galuega e fai e le Ombudsman. O ofisa uma nei e lipoti sao mai i le Palemene, mo le puipuiga o le amiontonu o le Malo lenei ma le Palemene o Samoa leaga o le Malo na mua i malae ae o loo faamalumalu mai i le Faigamalo lenei le Faavae o le Malo o Samoa. O a upu na e i ai? E faavae i le Atua Samoa, e faapea foi ana tu ma ana agaifanua, sa i tua o le faavaa, a o le a le mea lea ua outou faia? O lea ua outou tuua i tottonu o le fatu o le Faavae.

**20 IUNI 2019**

**Tulafono Tau Faaofi o le Faatatauina o Tupe Faaopoopo (Nu.2)  
2018/2019 & Tulafono Tau Faaofi o le Faatatauina o Tupe 2019/2020  
– felafolafoaiga i luga o le faiatuga faalua**

O lea la e silasila mai le Atua e afio i le mea lilo i nei tausaga e tele sa tatou faavalea ai o oe lea e faavae ai le Malo lenei, a o la e silafia lelei lava e le Atua e le o i totonu o le Faavae. O lea la ua tatou tuua i totonu o le Faavae. O le a la le uiga o ia mea? O le musumusuga lilo lena a le Atua o le Faavae o Samoa ia te outou o outou o auaua a le atunuu, ma e le sau faatagata se malaia po o se manuia o se faipule. Ia te au, o faamanuia ga na a le Atua i le Paeaiga lenei, ona ua outou faia mea silisili mo ia.

Lau Afioga i le Fofoga Fetalai, o la matou galuega, o le a amata mai i le sui usufono talavou le la o Afamasaga, lea e siamupini lana au. O tagata ia e i ai i le au le la, e malolosi tele. A le malolosi o mea ia e tolegi ai, e leai lava se niu o le Esetete Tausi e le i fe'aei ai i luga ma toli i lalo.

O lea la o le a amata mea le Afioga ia Afamasaga, e avatua tali a le Malo e tusa ai ma a outou talosaga. A o nisi mea e totoe ai, o le a faaiu atu ai lau tautalaga pe a oo mai ia te au le afi. Lau Afioga i le Fofoga Fetalai, o si au upu faaiu lena, ia manuia tele lau Afioga, manuia foi le tatou Maota nei. Faamanuia foi le Atua i le tapuaiga a Samoa.

**FOFOGA FETALAI:** Malo faafetai. Ua saunoa le Palemia, le Taitai o le Kapaneta e faamalamalama nisi o mea sa laga e sui mamalu. E le gata i totonu o lo tatou lotoifale i le Palestene, ae ia manino i le tapuaiga ma le faafogofa mai a le atunuu. O le mea la lea, malo le saunoa, faafetai foi e le faigofie faiva ma tiute, ae manatu lava ina ia manino la tatou galuega po o faapei i ona fai. Po o tatou faia ma le agaga faamaoni, ae po o tatou faia i luga o faiga faavae o lo o faapena ona tausi i ai ma faagasolo i ai tulaga o galuega a le Malo. O le mea la lea e momoli atu ai le faafetai ma le faamalo.

E momoli atu foi le faamalo i Ofisa Sili o Pulega o Matagaluega ma Faalapotopotoga i la latou foi faiva alofilima... e faapena ona lagolago ma fautua mai ma fesoasoani mai foi i la latou pitolaau latou te galulue faatasi e atinae le atunuu. Malo faafetai.

E talu ai ona o lea ua tatou taunu i le tatou taimi e na faatu ai le lafo ina ia faamuta a tatou galuega mo lenei aso.

O le mea la lea, ou te faamalulu atu i le Afioga i le Minisita o le a faaaauau lau saunoaga pe a tatou taliu i la tatou Fonotaga i le aso a taeao, pe a pule alofa le Atua e aulia i le lagi e mama ma le soifua manuia e pei ona faatuina mai le lafo.

Ae tatou te le i tolopo, o le a ou faaiuina la tatou Fonotaga i se tatalo.

*Na tolopo Tauualumaga a le Fono Aoao Faitulafono i le itula e 1:02 i le aoauli seiā aulia le itula e 9:00 i le taeao o le Aso Faraile, 21 Iuni 2019.*